क श्री जानकीवल्ळमो विजयतेतराम क्ष रसिकसम्राट् श्रीत्रग्रदेवस्त्रामी विरचित स्रोसीतारामध्यानमञ्जरी

> को मकरन्दमाधुरीटीका



टोकाकार सखेन्द्र श्रीरसरंगमणिजी महाराज

प्रकाशक

प्राप्ति स्थान श्री शत्रुहन शरणजी महाराज श्री रस मोद कुंज श्री श्रयोध्या भिमंघ शिक्षा मण्डल दुर्गाकुराड, वाराणसी 🕾 श्री जानकीवल्लभो विजयतेतराम् 🕾

रसिकसम्राट् श्रीअग्रदेवस्वामी विरचित श्रीसीतारामध्यानमञ्जरी

की

मकरन्दमाधुरीटीका



टीकाकार सखेन्द्र श्रीरसरंगमणिजी महाराज

प्रकाशक शान्ति जन कल्याण ट्रस्ट, कलकत्ता

द्वितीय संस्करण २००० प्रति

मूल्य प्रेमपाठ

## श्री जानकी जानिजयित

# अ भूमिका अ

श्री सोतारामीय मधुर उपासना अनादिसिद्ध है। श्री सदाशिव-संहिता के कथनानुसार वेदों ने श्री शैषभगवान् से इस उज्ज्वल उपासना का उपदेश प्राप्त किया है। श्री शिवसंहिता एवं श्री हनुमत्संहिता कहती है कि महामुनि श्री अगस्त्यजी ने श्री हनुमत्-लालजी से मधुर उपासना की विशेष शिक्षा प्राप्त की है। श्री भुसुण्डिरामायण का कथन है कि लोकपिता श्री ब्रह्माजी ने श्री भुसुण्डि भगत को श्री सीतारामीय मधुर उपासना सिखाई है। अनादि आर्ष ग्रन्थ श्री वृहद् रामायण के कोशलखंड में भगवान् व्यासदेव के मुखश्रुत श्री सीताराम रासकथा श्री सूतजी ने शीन-कादि महर्षियों को सुनाई है।

वर्तमान युग के आलवार आचार्यों में श्री शठकोप स्वामी की सहषंगीति एवं श्री रंगनायिकीजी का श्री रंगदेवजी के साथ विधिवत् विवाह भी इसी मधुर उपासना का साक्ष्य है।

हमारे पूर्वाचार्यों में भगवान् रामानन्द स्वामी का 'वैष्णव मताब्ज भास्कर', श्री अनन्तानन्द स्वामी की 'श्रीहरिमिक्त सिन्धु की वेला' भी श्री सम्प्रदाय के पूर्वकाल ही से श्री सीतारामीय मधुर उपासना का डिमडिम घोष करती आ रही है।

किन्तु श्री अग्रदेवाचार्य के पूर्व इस रसराजमयी श्री सीतारामीय उपासना की धारा अन्तः सिलला फल्गुगंगा की माँति लोकदृष्टि से गुप्त थी और थी त्रिवेणी से मिलनेवाली श्री सरस्वती धारा के समान अलक्ष । इस उपासना का व्यापक रूप से व्यक्त प्रचार करने का श्रेय रिसकाचार्यचरण श्री अग्रदेव स्वामी को है।

हमारे वैष्णव समाज में प्रचलित बावन द्वाराओं में जहाँ एक-एक द्वाराचार्थ के संस्थापित एक एक द्वारा गद्दी प्रसिद्ध है, वहाँ अकेले श्री अग्राचार्यंजी ने अपने शिष्यों और प्रशिष्यों के द्वारा तेरह द्वारापीठों की प्रतिष्ठा करवाई है।

आप श्री मैथिली सखी सर्वेश्वरी श्रीमती चन्द्रकलाजी के ही अवतारभूत महान रिसकाचार्य हैं, तो आपके युगान्तर उपस्थित करनेवाले क्रान्तिकारी विस्मयदाय प्रचारात्मक प्रभाव देखकर कोई आश्चर्य नहीं होता।

प्रस्तुत प्रकाशन का मूल ग्रन्थ श्रीसीतारामध्यानमंजरी, इन्हीं महान् प्रभावशाली विशिष्ट रिसकाचार्य की अमर कृति है। सम्प्रदाय में यह ध्यान मंजरी आशीर्वादी पुस्तिका मानी जाती है। इसके पठन-मनन से इसमें विणित ध्येय देश काल समाज सब श्रद्धालु पाठकों के ध्यानदेश में प्रत्यक्ष हो जाते हैं।

हमारे पूर्वाचार्यों में श्री स्वामी शंकरदासजी महाराज ने अपने पुत्र एवं शिष्य श्री स्वामी जीवारामजी महाराज से कुछ ऐसा ही कहा भी है—

''यही पद गाय ध्यान मंजरी मंगाय, कही माथै पघराय सियाराम हितकारी है। याको देस काल पढ़ते ही हिये भाखै तोहि आसिषा को फल थोरे काल ही में पाई है।

यही कारण है कि हम लोगों के देखते-देखते इस समाजपूज्य ग्रन्थरत्न के मूल, पाद टिप्पणी सहित तथा सरलार्थपूर्ण कई संस्करण विभिन्न प्रकाशन स्थलों से अब तक प्रकाशित हो चुके, फिर भी इसकी माँग वर्तमान भक्त समाज में उत्तरोत्तर बढ़ती ही जा रही है। समाज में इनकी लोकप्रियता स्पष्ट है।

हमारे भावमस्त रंगीले रिसक समाज में तो यह परमादरणीय ग्रन्थरत्न सदा से ही कंठहार बन कर रहते आये हैं। आज भी बहुत से महानुभावों को यह सम्पूर्ण लघु कलेवर ग्रंथ मुखाग्र हैं तथा इनके नित्य पाठ से वे ध्यान साधन में अत्यधिक सफल श्रम हुए भी हैं।

<sup>9.</sup> देखिये श्री सीताराम रसचन्द्रोदय का आद्य मंगलाचरणः एवं श्री रसिक प्रवाश भक्तमाल का छप्पय १५।

२. वही कवित्त १०, ११।

प्रस्तुत प्रकाश्य मूल ग्रन्थ के यशस्वी टीकाकार हैं श्री सख्यरस के भावावेशी सिद्ध सन्त प्रातः स्मरणीय श्री रसरंगमणिजी महाराज । आपके द्वारा रिचत मर्मस्पर्शी मधुर भावपूर्ण पदों को कुशल गायकों के मुख से सुनकर आज भी उत्सव समाजों के जुटे हुए सज्जन भाव में छक जाते हैं। टीकाकार ने अपनी स्तुत्य टीका का नाम रखा है मकरन्द माधुरी। यथा नाम तथा गुण! आप टीका पढ़ें तो आपका हृदय इसके सुरभित भावों से आमोदित हो ही उठेगा।

श्री 'मणि' जी महाराज जैसे वेदान्तदर्शन के प्रकाण्ड पंडित थे वैसे ही थे भावदेश के अन्त:स्थल में पहुँचे हुए अनुभवशील प्रतिष्ठित सिद्ध। जैसा मूलग्रंथ वैसी ही इनकी मकरन्द माधुरी टीका। मणि कांचन योग है कि खांड मिश्रित क्षोर।

टीका की भाषा है अवधी। ध्येय मिष्ट इष्ट श्री अवधिबहारी की मातृभाषा अवधी में टीका अधिक रसनीय हो गई है।

कई सज्जनों ने हमें राय दी कि आप टीका की अवधी भाषा को वर्तमान पठित समाज के लिए सुबोध हितार्थ हिन्दी की प्रचलित खड़ी बोली में रूपान्तरित कर दें या किसी विद्वान् को ऐसा कर लेने की अनुमति ही दे दें। परन्तु हमें भय हुआ कि महाराज श्री रसरंगमणिजी के प्रेमपंकिल हृदय से जिस रूप से टीका की समाधि भाषा निस्सरित हुई है, उसका ओज रूपान्तर भाषा में सुरक्षित नहीं रह पायगा। अतः प्रकाशक से हमने आग्रह किया कि आप पूज्य टीकाकार की मौलिक वाणी को अविकल रूप ही प्रका-शित करें। हुआ भी वहीं।

सहृदय पाठकों से आग्रह है कि आप टीका सहित इस ध्यान ग्रन्थ का अध्ययन मनन करते रहें, आपका ध्यान साधन सिद्ध हो कर ही रहेगा। अटल विश्वास है हमारा।

कलकत्ता के धनीमानी सज्जन श्री पुरुषोत्तमलाल जी धानुका के उदार द्रव्य दान से यह भक्त समाज के लिए महान् उपयोगी ग्रन्थरत्न प्रकाश में आ रहा है। उपकृत समाज का कृतज्ञ हृदय प्रकाशक के लिए स्वतः मंगलानुशासन करेगा। हम अधिक क्या कहें? वाराणसी के विद्वान् सज्जन श्री राधेश्यामजी खेमका के द्वारा प्रकाशन एवं सम्पादन आदि सम्बन्धी अशेष कार्य सम्पन्न हुए हैं आप भी धन्यवाद के पात्र हैं।

—प्रस्तुत ग्रन्थ के पठन-पाठन, प्रचार-प्रसार से समाज लाभान्वित हो, ऐसी मंगलकामना रखनेवाला

रसिक महानुभावों का लघु अनुचर:---

विनीत—शत्रुहनशरण श्रीरसमोदकुंज, श्री अयोध्या

# ॐ श्रो सीतारामाभ्यां नमः ॐ ॐ श्रीमते हनुमते नमः ॐ

दोहा—( टोकाकारकृत मंगलाचरण )

श्री सम्प्रदा सुदीप श्री, रामानन्दिह ध्याय। अग्न कीन्ह पद परिस निज, गुरु चरनन सिर नाय।। आसिरबादी राम सिय, ध्यान मंजरी मंजु। तासु तिलक हनुमत कृपा, लिखीं लिलत सुखपुंज।।

।।मूल।। ( मङ्गलाचरण मूलग्रंथकार श्रीअग्रदेवकृत )

सुनिरौ श्री रघुवीर धीर रघुवंस विभूषन।
सरन गहे सुख रासि हरत अघसागर दूषन॥१॥
सुन्दर राम उदार बान कर सार्गधारी।
हिय धरि प्रभु को ध्यान विदुष जन आनँदकारी॥२॥

# ॥ तिलक वार्तिक ॥

आदि में मङ्गलाचरण रूप सर्वाङ्ग ध्यान सुमिरि कै, निज मनोरथ के अनुकूल नाम, गुण, प्रमाव संक्षेत्र ते कि है कै, पुनि अनन्त भूत्रनाधार, अनंत दिव्य गुणागार, निर्गण निराकार, सिच्चदानन्द सार, रामरूप ध्यान की आधारशक्तिरूप श्री अवधपुरी को ध्यान कहेंगे ।। श्रो रामाय नमः । छन्द रोला । धीर रघुवंश विभूषण श्री रघुवीर को मैं सुमिरण करत हों । कैसे हैं कि शरण गहे ते सुखराशि हैं, अरु अघसागर तथा दूषण का सागर हरते हैं । यह अन्वय है ।

अब भाव कहते हैं। श्री नाम शोभा सम्पत्ति की खानि, आदिशक्ति, पराभक्ति, श्री रामानन्दकारिणी श्री सीता स्वामिनी सहित रघुवीर धीर रघुवंश विभूषण को मैं सुमिरत हों।

तहाँ श्री सिहत कहे, ताको भाव यह है कि हमारो श्री सम्प्रदाय है अरु यह ध्यान श्री जी का धन है; ताते उनहीं की कृपा ते मिलेगा। पुनि श्री रघुवीर यह एक ही नाम श्री जी का प्रन है; ताते उनहीं की कृपा ते मिलेगा। पुनि श्री रघुवीर यह एक ही नाम किहे, युगल नाम प्रगट, न कहे, ताको हेतु यह है कि श्री सीताराम एक ही तत्त्व हैं, केवल भक्तजनानन्द हित युगल हैं। यथा—

दो॰—गिरा अर्थ जल बीचि सम, किहयत भिन्न न भिन्न।
वन्दों सीताराम पद, जिनीहं परम प्रिय खिन्न।।
अरु रघुवीर शब्द ते सर्व विघ्नविनाशक, शरणागत-रक्षण समर्थ. किशोर रूप

श्री राम को ध्यान जनाये, और धीर कहने को भाव यह है कि धीरता बिना ध्यान धारण नहीं होय, सो निज धीरता का लवलेस देवैंगे। अरु रघुवंस विभूषन पद ते राजमाधुरी धुरीनता जनाये। कैसे हैं रघुवंस विभूषण कि शरण गहे सुखराशि हैं। अर्थात् शरण नाम रक्षक जानि जो कोई उनके चरणों को गहै, नाम तन, मन, वचन ते आश्रित होय; ताको सुख राशि हैं, अर्थात् सब दुख भय छोड़ाय कै, अभय सुख राशि देते हैं। अरु समुद्र सम अथाह अपार अघ अर्थात् अनेकन जन्मन के संचित पाप रूप दु:कमं अरु दूषण जे प्रारब्ध रूप दुर्गुण समुद्र सम डुबाने हारे ते दोऊ हरि लेते हैं। अरु सुख राशि नाम स्वस्वरूप निज स्वरूप को ज्ञान दिये, तब क्रियमान कर्म नहीं लागते ताते शरणागत जन अभय मोक्ष को पावते हैं। इति तात्पर्य भावार्थः।।१।।

अब दूसरे पद में परमतत्त्व सकल रसराशि विदुष उपास्य आनन्दमयत्व कहते हैं।

सुन्दर अर्थात् नख ते शिख लिंग सर्वाङ्ग महापुरुषलक्षणलिक्षत, मुनिमनमोहन, शृंगार रसमय रूप हैं, ऐसे सुन्दर श्रीराम अर्थात् श्रीजानकी जी के विषे रमणहारे अरु रमावनहारे तथा मुनिजनमनरमण रमावण हारे, पुनि अन्तर्यामी रूप चराचर में रमणहारे। उदार अर्थात् अपने चिद्रूप की सत्ता सबको देनहारे अरु तिनकी रक्षा हेतु युगल कर में वाण सारङ्ग चाप धारणहारे अरु विदुष, जे सारासार के ज्ञाता, तिनके आनन्दकरन हारे; ऐसे प्रभु नाम अघटितघटनाकारी धनुर्धारी को ध्यान हिय में धरि के सुमिरों, नाम चिन्तवन करत हों।

यह पूर्वपद की क्रिया यहाँ लागती है। सुन्दर पद ते अनन्त शुभगुण पूर्णता अरु राम पद ते निर्गुण-सगुण निराकार साकार सर्व परत्वपूर्ण, विचित्र विग्रह की अखंडता जनाये। उदार पद ते अर्थ, धर्म, काम, मोक्ष, भक्ति अपन्पी लिंग की प्रदानता औ बाण सारंगधारी में सर्वायुधों में धनुर्बाण की मुख्यता अरु दोई आयुध कहने से दिभुजत्व की अनादि सिद्धता जनाये।

अरु विदुष जन आनन्दकारी को भाव यह है कि मैं अविदुष हौं; ताते हिय में ध्यान धरत हौं, कि मोको भी विदुष बनाय कैं, आनन्दित करैंगे। अरु हिय में प्रथम ध्यान धरि कें सुमिरत हौं, जाते नित्य धाम को ध्यान मन वाणी में साक्षात्कार होय, तब वर्णन करौं। इति भावार्थः ॥२॥

#### ॥ मूल ॥

अवधपुरी निज धाम परम अति सुन्दर राजे। हाटक मनिमय सदन नगन की कान्ति विराजे।।३।।

# ।। अर्थ पूर्व प्रसङ्गः ॥

आदि में चारि चरण ते ध्यानमय म ज्ञलाचरण करि कै, अब श्री सीताराम ध्यान-मअरी आरम्भ करते हैं। तहाँ ध्यान मक्षरी का रूपक अर्थ यह है कि श्री सीतारामध्यानरूप कल्पवृक्षा-वलम्बित जो वेलि सम बुद्धि, ताकी वाणीरूपा मक्षरी है। ताकी टीका मकरन्द माधुरी है। तहाँ श्रीराम के नाम, रूप, लीला, धाम ये चारो सिच्चिदानन्दमयी नित्य हैं, अरु परस्पर एक-एक की नित्यता प्रतिपादन किर रहे हैं।

यथा श्रुति:—''तस्य नाम महद्यशः'' यह श्वेताश्वतरोपनिषत् की श्रुति कहती है कि तिन महायशस्वी का नाम है। तब तीनों आपही सिद्ध है। नाम है तो रूप अवश्य है और रूप है तो रूपकृत लीला विहार अवश्य है। अरु लीला विहार है तो ताको आधार धाम अवश्य है। सो प्रथम श्री रामरूप ध्यान की आधारभूता सिद्धिपीठ-रूपा अविधिपुरी का वर्णन करते हैं।

#### ॥ अर्थ ॥

"अवधिपुरी निज परम धाम अति सुन्दर राजै है।" अवधिपुरी के युगल रूप प्रसिद्ध हैं। एक नित्य, दूसरा नैमित्तिक। अरु, दोऊ नित्य नैमित्तिक मिलित भक्त मानसिक भावनामय अवधि को तीसरा रूप है।

तैसेहीं श्री अवधिविहारी के भी त्रिधा रूप हैं। पै तीनों एक ही हैं; औ तीनौ नित्य हैं। तहाँ पर अयोध्या प्रमाणसिद्ध हैं। अरु यह भूमि में लीला अयोध्या प्रत्यक्ष सिद्ध है। तथा भावनामयी प्रमाण प्रत्यक्ष मिलित अनुमान सिद्ध है। ऐसी परम प्रसिद्ध अवधिपुरी निजपुरी है।

निजपुरी किहबे को भाव यह है कि छवी श्रीराम की पुरी हैं। अरु अविधि निज पुरी हैं अर्थात् जैसे देस, ग्राम, पुर सब राजाही के हैं; परन्तु राजमहल मुख्य निज है; तैसे ही श्री रामचन्द्रजी की और सब पुरी देस ग्राम सम है, अरु श्री अविधि निज राजमहल इव है। सो श्री अविधिपुरी निज है। अरु परम धाम ही है। अर्थात् अवध ते निय कोई धाम नहीं है। यथा

चौपाई:—''यद्यपि सब बैकुंठ बलाना। वेद पुरान विदित जग जाना।। अवधि सरिस प्रिय मोहि न सोऊ। यह प्रसंग जानै कौउ कोऊ।।''

#### —इति मानस रामायणे

कोउ कोउ नाम विरले राज माधुरी रिसक उपासक जिन को यह अविध अति प्रिय है, ते जानते हैं।

सो श्री अवधि अति सुन्दर राजै है। अति सुन्दर की पुरी है, ताते अति सुन्दिर है श्री राजै है नाम तेजोमय है। अरु श्रीवाल्मीकि में वर्णन है, बारह कोश चौड़ी अरतालिस कोश लम्बी है। कैसी अति सुन्दिर राजै है, सो संयुक्ति संक्षेप रीति ते कहते हैं कि जामें संग ही पुरी राजभवन दोऊ को वर्णन ह्वं जाय। हाटक नाम सुवर्ण अरु मणिनमय सदन बने हैं। अरु तिन भवनन में नगन की कान्ति विराजती है, अर्थात् साधारण मणि सुवर्णं के सब गृह बने हैं, परन्तु आगे की ओर अरु द्वारि झरोखा कंगूरा कलसान में नग महामोल के रतन लगे हैं, तिनकी कान्ति शोभा विशेष राजै है नाम प्रकाशें है ॥ ३ ॥

> ॥ मूल ॥ पौरि द्वार अति चारु सुहावन चित्रित सोहै । चंपतार-मन्दार-कल्पतरु देखत मोहै ॥ ४॥

#### ॥ अर्थ ॥

अरु पीरि के द्वार अति चारु हैं। सोहावन चित्री ते चित्रित सोहते हैं। अर्थात् पौरि द्वार नाम प्रथम के द्वार, सिंहपौरि दरबजा सो अति चारु कहे सुन्दर है, जामें मूंगा की महराबदार अति ऊँची चौकठ लगी है। हीरन ते जटित हेम के कपाट लगे हैं। दोऊ दिशि मणीन के हाथी बने हैं। ऊपर दो सिंह शोभित हैं। इत्यादि अति सुन्दर रचना ते रचित हैं। औ सोहावन जो चित्र हैं, गऊवत्स, ब्राह्मण, बालक, कलसजुत नारी, कन्या कुमारी, अप्सरा, सूर्यं-चन्द्रादि देवता, फूले-फले देववृक्ष, तिनपर हंस मयूरादि पक्षी, मंगलमय भगवत् अवतार इत्यादि नयनमनहारी विचित्र चित्रों ते चित्रित हैं, ताते अतिशय सोहै हैं।

ते चित्र दो प्रकार के हैं। कोई सुवर्ण, मिण, मोती, मूंगान ते जिटत है, कोई केवल रंगन के हैं। ऐसो राजद्वार सोहै है, तैसही सब के द्वार सोहते हैं। अरु द्वार के आगे अति विशाल चौक सोहती है। तहां चंपतार मंदार आदि कल्पवृक्ष लगे हैं। पांति की पांति, ते देखत संते मन मोहि लेते हैं। चंपतार कोई वृक्ष है। इस काल प्रसिद्ध नहीं है। किन्तु चंपै को चंपतार कोई देश में कहते हैं। अथवा चंप कहे चंपातार नाम तरकुल। रकार लकार की सवर्णता मानि ताल को तार मंदार के जमक हेतु कहे हैं।

मंदार कल्पवृक्ष देववृक्ष हैं। ते तेहिकाल प्रत्यक्ष, अब ध्यान में मानसी नेत्रन ते देखत संत मन मोहि लेते हैं ॥४॥

> ।। मूल ।। भवन भवन चित्राम चित्र की रम्भा सोहैं । वनज सुतन की पाँति कान्ति गोखन मग जोहैं ।।५।।

प्रसङ्ग-यहि प्रकार चौक को ध्यान किह कै अब और ध्यान कहते हैं। भवन-भवन कहे राजमहत्त्र के भवन तथा पुरी भरे के भवनों में रंगन के अह रतनन के चित्राम हैं, सो श्री रामायण में भी वर्णन है-

> दोहा-—''चारु चित्रसाला गृह, गृह प्रति लिखे बनाय। रामचरित जे निरल मुनि, ते मन लेहि चोराय॥''

रामचरित अर्थात् चारो रघुनन्दन लालन के जन्म के, बाल लीलान के, ब्रत बन्धन के, वेद पढ़ने के, ताड़का सुबाहु हनन, यज्ञ रक्षन के, श्री सिया स्वयम्बर घनुभँग के, चारो भ्रातन के विवाहन के, श्री अवध आगमन परिछन आदि के, षटश्चतु विहारन के, इत्यादि चित्राम ज्यों के त्यों बने हैं कि भ्रम ते तद्रूप मानि मुनीन के मन मोहि जाते हैं।

अरु चित्र की रंभा नाम केरा भवनों के भीत पर अरु द्वारदेश में शोभित हैं। ते भीतों पर रंगों ते रची हैं। और द्वारन में सुवर्ण के पेड़, हरित मणिन के पत्र, अरुण मणिन के फूल औ हरितै कै फल, कोई पके फल पीत मणिन के सोहै हैं।

(वनज) अरु वन जे जल, ताते ज नाम उत्पन्न जो सीप, तिन के सुत मोती, तिन के पांतिन की कांति गोखन में है। तिन गोखन के मग ते मानो भवन जोहै (नाम देखते हैं)। अर्थात् भवनों में नीलादिक मणिन के गोखा झरोखा रचे हैं। तिन में मोतिन की झालर आदि पाँति की पाँति कान्ति जुत लगी हैं। ते गोखा झरोखा मानो भवन के नेत्र हैं। तिन नेत्रन के मग ते, जनु भवन सपरिकर श्री सीताराम जी को जोहै नाम देखि रहे हैं।

अथवा तिन गोखन को ध्याता ध्यान नेत्रों ते जोहै। गोक्षा गवाक्ष शब्द को अपभ्रंश गोखा है।।५।।

#### ॥ मूल ॥

तोरण केतु पताक ध्वजा तहँ विमल सुहाई। मनु रघुवर हित करन आय त्रिभुवन छवि छाई।।६।।

अर्थ—तोरण नाम बन्दनवार तथा द्वारन के आगे उपद्वार। खंभ महराब आदि रचना रचित बाहर के द्वार को भी तोरण कहते हैं। ते सोहते हैं। अरु केतु जे मध्य प्रमाण के हैं, अरु तिन ते छोटी पताका है अरु दोहून ते बड़ी ध्वजा है। तहाँ तिन भवनन पर अर्थात् अग्रभाग द्वारन में यथायोग्य वन्दनवारें अरु श्रृङ्गन कंगूरन में यथायोग्य केतु पताका औ मुख्य महलन गोपुरन पर ध्वजा, तिन में कंचन मणि रचित फूले, कचनार के वृक्षन के विचित्र चित्र सोहते हैं। ते विमल सोने के मणिन जटित दंडन सहित सोहाई हैं।

तिनकी किव उत्प्रेक्षा करते हैं कि मानो श्री रघुवर के हित करने के हेतु त्रिभुवन स्वर्ग, मर्त्य, पाताल की छिव केतु पताकन के रूप धरि कै अवध भवन पर आय कै छाय रही है। भाव यह है कि तीनो भुवन की छिव को सतावन हारे रावण के मारिबे को त्रिभुवन नाथ अवध में अवतरित भये। तब तीनों भुवन की छिव मानो सेवा हित विचारि अवध में आय कै छाई है कि श्री रघुवर को अवध अति प्रिय है, ताते अति हित मानेंगे।।६।।

# ॥ मूल ॥

# वीथी वगर बजार रतन खँचि जोति उजासा। रहन न पावै तिमिर सहज ही होत प्रकासा।।।।।

अर्थ: — अरु वीथी कहे गली, औ वगर तिन गलिन के टोला मोहल्ला; अरु बजार चौक चौहट्टा रचित राजमार्ग, ते सब नव रतन ते खिनत नाम जिंदत हैं। ते रतन निज जोति ते उजासा नाम उजियार किर रहे हैं। ताते कृष्ण पक्ष की राति में भी तिमिर नाम अधियार नहीं रहने पावे हैं। दोऊ पक्ष में सहज ही बिन दीप के प्रकाश होत है।

यथा श्री रामायणे

॥ चौपाई ॥

''बहु मनि रचित झरोला भ्राजै। गृह गृह प्रति मनि दीप विराजै''।।।।।

॥ मूल ॥

देखि पुरी छवि भरा मध्य के अँटकत रथ रिव। हरर्षाहं वरर्षाहं सुमन विवुध जन निरिव पुरी छवि।।८॥

प्रसंग : —यहि प्रकार चार पद ते राजभवन, पुरभवन, बजार आदि को ध्यान कहिकै, अब तिनकी अति छवि कहते हैं।

अर्थ: —ऐसी अतिशय छिव ते भरी श्री अविधिपुरी देखि कै मध्य के नाम मध्य दिवस के रिव को रथ अटकत है। तात्पर्य यह है कि मध्य दिवस के समय श्री दिनेश जी अवध के सामने होते हैं, तब छिवभरी पुरी देखि अरु निजकुलकुमुदकलानिधि श्री कौशल किशोर के केलियली लिख, अश्व सार्थी सहित आनन्दित खड़े रिह जाते हैं। पुनि मन्द-मन्द चलते हैं, सो श्री गोस्वामी जी भी कहे हैं।

पद

देखत अबध को आनन्द । हरिष वरषत सुमन दिन दिन देवतन के वृन्द ।। मध्य दिवस विलंबि चलत दिनेस उडगन चन्द ।। इत्यादि

—श्री गीतावली २३ (पूरा पद परिशिष्ट में)

तैसही श्री रघुवर छैल छबीले की पुरी की छिव निरिष्य कै विवुध, विधि इन्द्रादि देवता अति हरषते हैं। अरु कल्पतरु के सुचि सुगन्धित सुमन वरषते हैं अर्थात् श्री अवध विलासी अवध निवासिन युत अवध को सुमनौ ते पूजते हैं।।८॥

।। मूल ।। श्री रघुवर जस भरी पुरीवर वर की दायन। धर्मसील नर नारि सबै प्रभु सुजस परायन ॥९॥ अर्थ: —श्री रघुवर यश ते भरी पुरी वर वर की दायिनी है। श्री कहे शोभा अरु श्री जानकी जी। तिनते सहित रघुवर को जस नाम प्रबल प्रताप की कीरति अर्थात् ताड़कादि संहार, श्री विश्वामित्र मख रक्षन, शम्भु धनु-भंजन, श्री जनकमनरंजन, जगतविजयी परसुधर गर्वगंजन, श्री विदेहनन्दिही विवाहन, पुनि श्री अवध में आय कै प्रजन को सप्रेम प्रिय हित उमाहन, पुरकार्य करनो, इत्यादि श्री रामायण कथित श्री रघुवर यश ते पुरी भरि रही है। अर्थात् बालक, युवा, वृद्ध नरनारिन के मन में श्री रामगुणयश भरि कै समाते नहीं। सो वचन मिसु कहते हैं। ताते दिन रात कहते हैं, सुनते हैं, गावते हैं, अनुमोदन करते हैं। ऐसी श्री रघुवर यश भरी पुरी है। यह गुण कहि कै पुनि महत्व कहते हैं।।१०।।

पुरी वर वर की दायिनी है। वरश्रेष्ठ वरदान अर्थात् अर्थ, धर्म, कामादि तथा श्री राम प्रेम भक्ति, अन्त में मुक्ति अर्थात् निज नित्य रूप से धाम में निवास। यथा श्री रामायणे:—

चौपाई- "रामधामदा पुरी सुहाविन । लोक समस्त विदित जग पाविन ॥ चारि लानि जग जीव अपारा । अवध तजे तन नींह संसारा ॥ सब विधि पुरी मनोहर जानी । सकल सिद्धिप्रद मंगल लानी ॥

पाठ में 'दायन' है, सो परायन के अनुप्रास हेतु है। परन्तु अर्थ में दायिनी कहना काव्य की ऐसी रीति प्रसिद्ध है।

अब गरा भरी को भाव देखावते हैं। धर्मशील नरनारि हैं, सो धर्म में दो प्रकार हैं। एक वर्णाश्रम धर्म, दूसरा विशेषभगवतधर्म। तिन दोनों धर्म में शील कहे स्वभाव हैं सब नरनारिन को अर्थात् सब नर एकनारि निरत हैं अरु नारि सब पतिव्रता हैं।

तथा विशैषभगवत धर्मा श्री रामप्रद प्रीति सो स्वाभाविक है। याही ते सब प्रभु श्री सीताराम के सुयश में परायण तत्पर हैं। सोई आगे कहते हैं:—

# ॥ मूल ॥

गावत रघुवर चरित मिलत जित तित ते भामिनि । स्वर अस कोकिल नाद रूप जनु दमकत दामिनि ।।१०।।

अर्थ —श्री रघुवर को चरित गावती भईं। भामिनी नाम नारि मिलती हैं। अर्थात् निज वृन्द सहित नारि श्री रामचरित गावती हैं। कोई श्री सरयू जी ते आवती हैं, कोई जाती है, बीच में मिलती हैं। ऐसेहीं राजमहल की दूसरी दूसरी राह ते गावती आवती हैं। राजमार्ग में मिल जाती हैं। अथवा ध्याता भाविक को भावनारूप में गावती नारि मिलती हैं।

ते हैं कैसी कि कोकिला के नाद नाम कुहुक ऐसा कंठस्वर है। और रूप की दुति तो जनु दामिनी दमकती है। औचक निहारे ते नैनन में चकचौंबी छाप जाती है। भाव यह है कि मानों आनन्द मेघ की पुरी में दुतिरूपा दामिनी निवसी है।।१०।।

# ॥ मूल ॥

तिन जुवतिन को भाग बरिन का पै कहि आवै। सिव सारद नगसुता देखि कैं मन छळचावै।।११।।

अर्थ अग्रदेव स्वामी कहते हैं कि तिन युवितन की भाग वरणि के काएँ किह आवै। तिन किन युवितन को कि जिनको श्री सीताराम जी यथायोग्य निज नित्य-सम्बन्धिनी मानते हैं, दर्शन देते हैं, यथोचित सम्मान करते हैं। तिनकी भाग को देखि अर्थात् जा समय श्री जनकनिदनी रघुनन्दन जी को लोचनन ते लखती हैं, लिलत वचन सुनती हैं, विमल विनय सुनावती हैं, ता समय सुरेश की शची, विरंचि की शारदा शिव की नगसुता पार्वती देखि कै मन में ललचाती हैं कि अहो इन युवितन सम हम न भई ॥१९॥

### ॥ मूल ॥

अवध पुरिन की अवधि यही श्रुतिसंमृति वरनी। ध्यान धरे सुल करनि नाम उचरत अघ हरनी।।

प्रसंग —यहि विधि पुरवासिन को भाग कहिकै, पुनि पुरी के प्रभाव कहते हैं। अर्थ —अविधिपुरी सब पुरिन की अविधि नाम मर्यादा है। यही सिद्धान्त वार्त्ता श्रुति स्मृतिन ने वरनी है।

तहाँ कृष्ण यजुर्वेद तैतिरीयशाखा की दो श्रुति प्रमाण :---

- (१) अष्टचक्रा नवद्वारा देवानां पूरयोध्या, तस्यां हिरण्यमयः कोशः स्वर्गो लोको ज्योतिषावृतः ॥
- (२) यो वै तां ब्रह्मणो वेद अमृतेनावृत्तां पुरीं तस्मै ब्रह्म च ब्रह्मा च आयुः कीर्त्त प्रजान् ददुः ॥ इत्यारण्यके भद्रयक्ते

# ॥ अर्थस्मृतिप्रमाण ॥

अयोध्या च परंब्रह्म सरयू सगुणः पुमान्। तिनव।सी जगन्नायः सत्यमेतद् ब्रवीमि ते।।१।। ''विष्णोः पादमविन्तिकां गुणवतीं मध्ये च काञ्चीपुरीम्। नाभौ द्वारवतीं तथा च हृदये मायापुरीं पुण्यदाम्। ग्रीवामूलमुदाहरन्ति मथुरां नासाग्रवाराणसी-मेतद् ब्रह्मपदं वदन्ति मुनयोऽयोध्यापुरीं मस्तकम् ॥''॥२॥

एवं सहस्रावधि श्रुति-स्मृति प्रमाण हैं। अर्थात् जैसे सब अंगों के ऊपर अवधि सस्तक है, तैसे सब पुरिन लोकन के ऊपर मस्तक सम श्री अवधपुरी है।

कवित्त-पुरुष के पायन अवंती गुणवंती लसै,

पुरी कांची कटि द्वारावति नाभी भ्राजती।

माया हृदय माहि कंठ मथुरा कहाहि कासी,

नासा अग्र पाहि छत्रौ छहूँ अंग छाजती।

एई ब्रह्मपद कहैं मुनि 'रसरंग' भनी,

सबन के सीस पर अवधि विराजती।

अवधि के सीस पर मुकुताभरण सम,

सरित सिरोमणी सरजु सोभा पावती।

यह कवित्त दूसरे क्लोक को अर्थ है।

अवधि तो सब ही पुरीन की अवधि है।

## ॥ कवित्त ॥

जोग की अवधि दिव्य-भोग की अवधि,

न वियोग याके मधि भवरोग अवषिध है। ज्ञान की अविध प्रभु ध्यान की अविध,

दुलहान की अवधि देनि सुल को उदधि है ॥१॥

जस की अवधि भिक्तरस की अवधि,

रामवस की अवधि प्रेमघृत हेतु दिध है।

रामरूपा जानि बसि सेवै रसरंग मनि,

अविध तो सब ही पुरीन की अविध है।।

अरु श्रुतिन को यह अर्थ है कि आठ चक्र नाम आवरण हैं जिसके, अरु नवद्वार हैं जिसके, ऐसी देवनाम प्रकाश रूप अर्थात् सचिवदानन्द विग्रहवन्तों की पुरी अयोध्या है। अर्थात् शरीरवत् भगवत्शक्ति रूपा है। तिस में हिरण्यमय तेजोमय कोश बने हैं, जिसको स्वयं स्वर्गलोक कहते हैं। ज्योतिनाम ब्रह्मप्रकाश करि के आवृत नाम वेष्टित हैं।।।।।

जो पुरुष अमृत करि कै आवृत तिस ब्रह्म की पुरी को जानता है, तिस के वास्ते ब्रह्म कहे परब्रह्म औ ब्रह्मा आयुर्वल, कीर्ति प्रजा देने हैं। यह पुरी के ज्ञान मात्र का फल है। अरु उपासना करने ते पुरी को वास मिलता है। यह अर्थ परा अयोध्या को प्रतिपादक है। पुनि दूसरा अर्थ करते हैं। सब पुरीन की अविध नाम मर्यादा यही प्रत्यक्षक्षण अविध है। यही अविध श्रुति-स्मृति करि कै बरनी गई है कि सब पुरीन की अविध है। अरु ध्यान धरे सुख करनी है। तथा नाम उच्चारत संतै अघहरनी है। तिन नामों की:—

# ॥ दोहा ॥

जयित अयोध्या कोसला, जय विमला साकेत। जयित अवध अपराजिता, सत्या सरजु समेत।।

यामें धामी धाम के परत्व की एकता देखाई कि जैसे धामी श्री राम को ध्यान अखंड आनन्द दाता है, तैसे श्री अवधि को ध्यान सुखदाता है। अरु जैसे श्री राम के नाम उच्चारण ते अघहारी हैं। यामें दोनों की मोक्ष प्रदानता व्यंजित है, क्योंकि अत्यन्त दुःख की निवृत्ति अरु परम सुख की प्राप्ति को मोक्ष कहते हैं। सो नाम स्मरण से अघ अरु ताको फल दुःख इन दोहुन को नास करि कै ध्यान धरे ते सुख रूप मोक्ष की दाता है, ताते सब पुरिन की अवधि है। 19२।

### ॥ मूल ॥

करि करि बहुत कलेस कहत उपमा जो गुणि जन। अन्य उक्ति सब अल्प अविध सम अविध भले वन ॥१३॥

प्रसङ्ग-अब श्री अवधि परत्व को पूर्ण करते हैं।

अर्थ—गुणी जन कहे किवजन, बहुत कलेस नाम बुद्धि दौराय कै, अनेकन कल्पना किर किर जो अविध को उपमा और पुरिन की कहते हैं, सो अन्य उपमा की उक्ति नाम कहिन सब अल्प कम हैं। अर्थात् भली नहीं है। ताते थिक कै कहते हैं अविध की सम अविध हैं। यही उनमा भले बनै है, और नहीं बनै। यह अनन्योक्ति (अनन्वय) अलंकार है। यथा

# ॥ चौपाई ॥

''लही न कतहुँ हारि हिय मानी । इन सम यइ उपमा उर आनी ॥'' ऐस ही श्री अविधि तिन्दु ग्रन्थ में भी कहे हैं।

#### ॥ पद ॥

श्री अवधपुरी की यह छिब पर मैं वारी। ब्रह्म भवन वैंकुंठहु का है का कैलास विकारी। त्रिगुण तीन देवन की ते हैं या तो उन ते न्यारी।।

अर्थात् अवधि निरूपम है ।। १३।। इत्यादि ।

🖇 यह श्री अवधविन्दु श्री काष्टजिह्वा स्वामी कृत ग्रन्थ दर्शनीय है।

—दीन शत्रुहनशरण

### ॥ मूल ॥

वापी कूप तडाग रतन सोपान बनाये। रहे अमल जल पूरि विकसि कल्हार जु छाये।।१४॥

प्रसंग—इस ग्रन्थ में अवधि ऐसा ही पद है। अरु अन्य ग्रन्थों में अवध ऐसा पद है। तहाँ अर्थ में किंचित् भेद है।

अविध नाम सब पुरिन की मर्यादा है अरु अवध नाम कालादिकों ते वध नहीं; परन्तु पुरी के संग अविध औ पुर के संग अवध भलो भासे है। भाषा पद है ताते।

अर्थ—श्री अवध में ठौर-ठौर बावड़ी, कूप, तालाब हैं। तिनमें रतनन की सीढ़ी बनी है। अरु अति निर्मल जल ते पूरण हैं अरु कल्हार नाम सुगन्धित कमल (सौगन्धिकं तु कह्लारं अर्थात् रात में खिलने वाली कुईं नामक श्वेत कमल) फूलि कै वावड़ी तालावन में छाइ रहे हैं।।१४।।

### ॥ मूल ॥

सीतल तरु की छाँह विहुँग कूजत मन भाये। चहुँ ओर आराम लगत उपवन जु सुहाये।।१५॥ तिन पर केकि कपोत कीर कोकिल किलकारत। सुर धरि तिनकी देह मनो प्रभु सुजस उचारत।।१६॥

अर्थ — तिन बाउड़ी तालाबन के तीरन में शीतल वृक्षन की छाया है। तिन वृक्षन पर बहुत रंग के विहंग रस-रंग मनभाये बोलि रहे हैं।

पुनि अवध के चारहूँ ओर आराम नाम बाग, उपवन, फुलवारी अर्थात् बारह वन, बारह उपवन मुख्य और लघु दोरघ अनेकन लगे हैं। ते अति शोभायमान लगते हैं।।१५॥

तिन पर अर्थात् आरामौं के वृक्षवृन्दौं पर केकि (मोरी मोर) कपोत (कबूतरी) कीर (सुकी सुवा) औं कोकिला ते सब किलकारि रहे हैं। नाम सानन्द स्वर ते कुहुिक रहे हैं। ताकी उत्प्रेक्षा कहते हैं कि मानो तिन पिक्षन की देह धिर कै सुर इन्द्र ब्रह्मादिक प्रभु नाम समर्थदेवाधिदेव श्री रामचन्द्र जी को सुयश उचारि रहे हैं।।१६॥

#### ॥ मूल ॥

झूमि रहे लगि भार डार फल फूलन भारी। पथिक जनन फल दैन मनहुँ तिन भुजा पसारी।।१७।।

प्रसंग—अव वृक्षन को बरनते हैं।

अर्थ-भारी वृक्षन की डारन में फल-फूलन के भार लगि कै झूमि रहे हैं। तिनकी उत्प्रेक्षायुत उपमा कहते हैं कि मानो तिन वृक्षन पंय में चलने हारे पयिक जनन को

फल देने के हेतु निज डार रूपी भुजा पसार रहे हैं। यामें यह व्यंजित है कि ते वृक्ष कल्प वृक्षों से भी अधिक उदार हैं। ताते बिन मांगे ही देवे को हाथ पसारे हैं।।१७।।

# ॥ मूल ॥

निकटोंह सरजू सरित धरे अस उज्जल धारा। भवसागर को तरन विदित यह पोत उदारा॥१८॥

प्रसंग—अब श्री अयोध्या जी को श्रृंगार हार श्री सरयू जी का ध्यान प्रभाव कहते हैं।

अर्थ—निकटिहं अर्थात् अवध के निकट आराम उपवन हैं। तिन आरामों के निकट ही श्री सरयू हैं। सर ते उत्पन्न भई ताते सरयू नाम है। सो सरित अस उज्जल नाम क्वेत शांत रस रूप अथवा उज्ज्वल श्रृंगार रस रूप, काहे कि श्रृंगार रस नेत्र-जन्मा है और सरयू भी श्री रामनेत्रजा हैं। सो धारा को धारण किये हैं। सो धारा अस है कि भव संसार सागर को तरन नाम पार होने के हेतु यह धारा विदित अर्थात् वेद विदित उदार पोत नाम जाहिर जहाज हैं।

उदार कहने का भाव यह कि ऊँच-नीच, पुण्यात्मा पापी, काहू को रोक-टोक नहीं । बिना दाम ही चढ़ने-उतरने की जामे सो, तामे श्रीमुख वचन प्रमाण:—

"जा मज्जन ते बिनिह प्रयासा। मम समीप नर पार्वाहं बासा॥" तथा उदारता वर्णन ॥

### ॥ कवित्त ॥

जग के तमाम नर वाम रामधाम जात,
नाम गुन ग्राम सुचि सरजू के सुनि-सुनि ।
जम की जमात जम द्वारे विललात गहे,
पावत न पापी पछितात सीस धुनि-धुनि ।।
अंग-अंग फूल 'रसरंग मनी' कूल बिस,

राम गंग महिमा महान अस गुनि-गुनि । तारिवे को तरल तरंग हाथ से उठाय,

मानहु पुकारती है पातिकन पुनि-पुनि ।।

तहाँ स्नान-पानादि सोई नौका में घढ़ना है। औ पार उतरना धारा जहाज के एक धर्म की उपमा है।।१८॥

### ॥ मूछ॥

हरन पाप त्रय ताप जनन चिंतत फल देनी। सुकृती जन आरोह सुदृढ़ बैकुण्ठ निसेनी।।१६।। अर्थ — पुनि कैसी हैं सरयू जी की धारा कि कमं, वचन, मन के पाप अरु तिन पापन के फल जे त्रिविध दैहिक, दैविक, भौतिक ताप तिनकी हरन हारी हैं। अरु चितन, नाम स्मरण करिकै प्रार्थना करे ते चारो फल देनेहारी हैं। अरु सुकृती जनों के बैकुण्ठ लोक में आरोह नाम चिढ़बे को सुन्दर दृढ़ निसेनी कहे सीढ़ी है। अर्थात श्री सरयू जी को श्री रामरूपा मानि तथा तिन को जल रामकृपामय जानि, जे सुकृती दशंन, पूजन, मज्जन, पान प्रतिदिन करते हैं; ते मानो बैकुण्ठ धाम के सीढ़िन में चिढ़ि रहे हैं। देहांत में बैकुण्ठ धाम में प्राप्त होहिंगे। सुकृती जन कहने को भाव यह है कि बहु जन्म के सुकृत बिना श्री सरयू में प्रेम नहीं होय। अरु सुदृढ़ पद प्रभु प्राप्ति हित सुदृढ़ साधन जनाये। इहाँ वैकुंठ केवल विष्णु लोक ही की संज्ञा नहीं है, किन्तु जो परम धाम अयोध्या को अर्थ है, सोई वैकुंठ को है। जैसे कालादिकों ते युद्ध में न जीती जाय, ताको अयोध्या किहये; तैसे कालादिकों ते कुंठित नाम हत न होय, ताको वैकुंठ कहिये, अर्थात् परम धाम अयोध्या।

यथा—''सुनु मित मंद लोक वैकुंठा।''

शंका—श्री सरयू को प्रथम भवसागर की जहाज कहे, पुनि वैकुंठ निसेनी क्यों कहे ?

समाधान—प्रथम असुकृती सुकृती सबन को सामान्य भवसागर तारना अर्थात् जन्म-मरन छुटाय देना कहे, पुति सुकृतीन को वैकुंठ धाम श्री राम समीपता प्राप्ति विशेष मुक्ति जनाये । आगे सुजन जानैं ॥१९॥

### ॥ मूल ॥

तीर नरन की भीर लगत अस परम सुहाये। मनहुँ व्योम को त्यागि अमरगन सेवन आये॥२०॥

अर्थ--तहाँ श्री सरयू तीर में स्नान करन हारे नरन की भीड़ है, ते नर अस शोभायमान लागते हैं कि मानौ व्योम स्वर्ग को त्यागि कै इन्द्रादि अमरगण श्री सरयू को सेवन हेतु आये हैं।

यामें श्री अवधि निवासशीलों को रूप तेज इन्द्रादिकों के सम, अरु आकाशगंगा ते श्री सरयू को माशतम्य अधिक व्यंजित है ॥२०॥

## ॥ मूल ॥

करें जो मज्जन पान धन्य बड़ भाग जनन के। विविध भाँति के घाट तहाँ मन थिकत मुनिन के।।२१॥

अर्थ अब संक्षेप ते श्रो सरयू सनेहिन की प्रशंसा करते हैं औ सिहाते हैं। अहो जो नित्य श्री सरयू जो को मज्जन-पान करते हैं, तिन जनन के बड़े माग हैं अरु अति धन्य हैं। यह कहने में निज नित्य प्रत्यक्ष स्नान पान के वियोग की अनु-ताप भी भारी है। अरु श्री सरयू जी में विविध मौति के अर्थात् चारों वरणन के जुदा-जुदा, नारिन के हित जुदा घाट कंचन मणिन ते बँधे हैं; तिनकी शोभा देखि कै मुनिन के जे सहज विरागी मन हैं, तेऊ मोहि के थिकत होते हैं ॥२१॥

# ॥ मूल ॥

नीर परम गंभीर चलत गहिरे सुर गार्ज । तहाँ तीर बहु सघन कमल अति सुन्दर राजे ॥२२॥

अर्थ—अह श्री सरयू जी में नीर परम गंभीर नाम अति गहिर है सो चलते में गंभीर स्वर ते गरजै है। मानो सिंह रूप गरिज कै हाथी रूप पापों को भगावें हैं। पुनि जहाँ घाट बन्धे हैं तहाँ तीर में बहु नाम बहु प्रकार के अरुण, सेत, पीत, नील बहुत सघन कमल अति सुन्दर राजते हैं नाम शोभित हैं। अति सुन्दर अर्थात् लक्ष्मी जी के मन्दिर सम किन्तु श्री सीताराम जी के तन कर चरण नयनन सम हैं। धारा में कमल की शङ्का होने योग्य नहीं है, काहे कि सतयुग त्रेता में सरयू गंगादिकों को प्रभाव परम प्रगट रहा। ताते कमलों को बहाउती नहीं रहीं। इसी ते कमल फूलते रहे।।२२॥

## ॥ मूल ॥

कमल कमल के मध्य जूथ मिलि भँवर गुँजारैं। मानहुँ मुनि जन वृन्द वेद धुनि शब्द उचारै।।२३।।

अर्थ:— तिन प्रति कमलन के मध्य में जूय नाम बहुत मिलि के भ्रमर रसपान किर कै, पराग में रँगे, मत्त मुदित गुँजार किर रहे हैं, सो मानो मुनिजनौं के वृन्द वेदधुनि को शब्द उच्चारण किर रहे हैं। इहां अनेकन भ्रमरौं को मिलित प्रिय शब्द की उपमा है। सोई श्री गोस्वामी गीतावली में कहे हैं। (पद) विकसित कमलावली चले प्रपुंज चंचरीक, गुंजत कल कोमल धुनि त्यागि कंज न्यारे। जनु विराग पाइ सकल शोक कूर गृह विहाय भृत्य प्रेममत्त फिरत गुनत गुन तिहारे। २३।

## ॥ मूल ॥

त्रिविध वयारि विहार बहत निप्ति दिन अघहारी । सीतल मंद सुगंध परम अति आनेंदकारी ॥२४॥

अर्थः —तीन प्रकार की वयार नाम पवन विहार रूप अघ नाम पाप दुःखहारी रात दिन बहै है। इसी का अर्थ दूसरे पद में है। तीन विधि कौन है कि शीतल, मन्द सुगन्ध अर्थात् मलय मिलित, पुनि श्री सरयू स्नान करिकै श्री अवध आरामन के फूलन

श्चित्रोगोतावलो बालकाण्ड पदसंख्या ३८ ''जागिये कृपानिधान जानराय रामचन्द्र'' — शत्रुहनशरण

की सुगन्धि हरि कै, परम शीतल सुगन्ध, मंद मंद अति आनन्द कारो तिहार रूप में बहै है। अघहारी को हेतु श्री सरजूजलमिजित, अवधरजरंजित सारिकर श्री सीता-रामजी के श्री अंगन के संसर्ग सम्पत्ति से पिवत्रतर है। ताते तन के और श्वास संग अंतर के अघहारी है। १४॥

# ।। मूल ।। बोलत चकवा कुंड तीर मन मोद बढ़ावें । मानहुँ परम सुदेश निकर मिलि गंध्रव गावें ।।२५॥

### ॥ अर्थ ॥

चकवा पक्षी कुंडन के तीर अर्थात् श्री सरयूजी में गिहरे कुंड हैं, जैसे श्रीलक्ष्मण-कुंड, निर्मेलीकुंडादि अरु बाहर जैसे श्री सीताकुंड, विद्याकुंडादि; तिनके तीरन में बोलते हैं। सुनत संते मन में मोद बढ़ाते हैं। मानहु गन्धर्व निकर कहे वृन्द वृन्द मिलि कै, सुदेश नाम स्वर, राग, ताल, बन्धान ते; तथा सुदेश नाम सुन्दर पवित्र ठौर में श्री सीतारामचन्द्र जी के गुण गावते हैं॥२५॥

# ।। मूल ।। श्री अशोक वन ।। कानन तहाँ अशोक अशोक तेहि देखत भाजै । विविध भाँति के वृक्ष सबै वृत्दारक राजे ॥२६॥

प्रसङ्ग-इहां लिंग श्री अवध उपवन श्री सरयू जी का ध्यान वर्णन किये, अब मुख्य कहते हैं।

अर्थ—कानन तहाँ अशोक, तहाँ श्री अविध सरयू के सिंध में, कानन श्री सीता-रामजी को नित्य विमल विहार बन अशोकनाम यथा नाम तथा गुण भी कहते हैं। शोक तेहि देखत भाजें, शोक जो स्वस्वका परस्वका प्राप्ति में संशय का दुःख, सो तेहि कानन को प्रत्यक्ष किन्तु ध्यान में देखत संते भाजें हैं। सो जब शोकसंशय दुःख भागा, तब स्वस्वक्प प्रभुस्वक्ष्प के अनुभव को सुख नाम प्रमोद आया, याही ते इसकी प्रमोद वन संज्ञा है।

श्री अशोक वाटिका विलास श्री विदेहजाशरण महाराजकृत तथा आर्वप्रमाण के लिए श्री वाल्मीकीय रामायण उत्तरकांड सर्ग ४२ देखिये।

\* वृन्दारक = देव ।

श्विपिन असोक जहें व्यापत न सोक सिय अलिन के थोक रास ओक बहु सोभाकर।
 क्रीडाचल सरित सरोवर विहंग वर वाटिका सुघर सुरतक पांति लताधर।।
 नाग नर देव नृप गंधर्वसुता अनेक कोटिन के वृन्द मध्य राजै नित सियावर।।
 सरजू के तीर बहै सीतल समीर तहाँ बैठि वर नीर निरखा पुलनादि धर।।
 —श्री रसिकप्रकाश भक्तमाल से
 —श्री रसिकप्रकाश से

अरु श्री वास्मी किजी अशोक विनका नाम कहे हैं। श्री जानकी गीत में अशोक वाटिका कहे हैं अरु उपनिषत् में सोमस बन करि कै कहे हैं।

परमधाम में तिसाबन में विविध भाँति के वृक्ष हैं अर्थात् विविध भाँति के जाति के विविध भाँति के रंग अरु आकार के हैं।

मुख्य जाति अशोक, आम, आमरा, कदंब, बेल, कदली, चंपक, तमाल, नारियर, जामुन, पनस, सुपारी, मेवा, बादाम, छोहारादि अनेकन हैं।

रंग हरित, नील, पीत, अरुण, राजते हैं। आकार कोई ऊँचे, कोई नीचे, कोई लघु विस्तार के, कोई दीरघ विस्तार के हैं।

तैसे ही कुसुमित ललित लतानके वृन्द लहराय रहे हैं।

ते सबै वृन्दारक राजैं अर्थात् प्रशस्तवृन्द वाले, देवता अंश शक्तिन ते वृक्ष बेलिन के वपुष बनाय युगल प्रभुन के सुख सेवा हित राजते हैं। अरु सबै जे देववृक्ष मंदार, पारिजात, संतानक, कल्पतरु, हरिचन्दन, ते भी राजते हैं।।२६।।

# ॥ मूल ॥

साला पत्र अनूप कहा कहों सोमा उन की। फल कुसुमन के झुंड निरित सुधि रहत न तन की।।२७॥

अर्थ—ितन वृक्षन के शाखा पत्र अनूप हैं। किव कृपाल कहते हैं कि उनकी शोभा मैं मुख ते कहा कहाँ ? क्यों कि सबै वृन्दारक हैं, ताते अनूप अकथ हैं। केवल मनमोद-दायक हैं ? अरु फल कुसुमन के झुंडन ते ऊँचे ते नीचे ताई मंडित हैं। तिनको निरिष्ठ कै तन की सुधि नहीं रहती। अर्थात् ते वृक्ष श्री सीताराम युगल कृपाल के करकमलन ते परसित हैं अरु अवलोकिन कृपा अमृत तें सिचित हैं। ताते आनन्द में डुबाय कै तन को भान भुलाय देते हैं।।२७॥

# ॥ मूल ॥

कल्पवृक्ष के निकट तहाँ यक धाम मनिन जुत । कंचनमय सब भूमि परम अति राजत अद्भुत ॥२८॥

अर्थ—तहाँ करुपवृक्ष के निकट एक मुख्य धाम मणिनयुत कंचनमय हैं। तैसहीं मणिनयुत कंचनमय सब भूमि है। अति अद्भुत प्रकाशमय सोहत है। अर्थात् जहाँ सबै वृक्ष वृद्धारक राजते हैं, तहाँ मध्य में दिव्य करुपवृक्ष है। ताके करुण रस रत्नमय मूल है। अरु दच्चवत् पृष्ट नील रंग पेड़ को स्तम्भ है। तैसही नीले रंग के मणि सम प्रकाशमय स्कन्ध शाखा हैं। अरु हरित रंग के पत्र परम कोमल प्रकाशमय हैं। सुधा सम, सुगन्धि सहित, लाल रंग के फूल हैं। अरु चिन्तामणि सम अरुण आनन्दप्रद

सुधारसरूपी फल हैं। पुनि तेहि वृक्ष ते अमृत के बुन्द सदा झरा करते हैं। सो श्री सीताराम युगल कृपाल के करुणा, औदार्य, करप्रदानता गुण को रूप है, वह कल्पवृक्ष । ताके निकट एक नाम मुख्य, सब धामों में उत्तम, अद्भुत नाम विचित्र अलौकिक धाम है।

यह श्री अग्राचार्य स्वामी श्री सीताराम जी को ध्यान सर्वसम्मत कहते हैं। अर्थात् श्रीरामतापनी, श्रीरामस्तवराज, अगरत्यसंहिता, सुन्दरीतंत्रादि श्रीराम-रहस्य ग्रंथन को सार भाग है। अरु निज भावना श्रृंगार सख्य दास्यादि रसानुकूल है। तथा नित्य नैमित्य ऐश्वर्य मिलित महा माधुर्यारूप है।

सो मुख्य धाम कैसो अद्भुत है कि कमलाकार है। तहाँ प्रथम आवरण को जगमोहन चारो ओर है। तामें कंचनमणि खचित, खम्भ रचित, महामनोहर, मेहराब-दार बत्तीस द्वार हैं। तिनके ऊपर छवीले छज्जा छाजते हैं। ते बत्तीसौ द्वार मानो कमल के बत्तिस दल हैं। ताके अंतर चारों तरफ दूसरा जगमोहन है। तामे सुन्दर सोरह द्वार हैं। ताके अंतर तैसही कमलाकार, गोल, चौतरफ विशाल, बारह द्वार हैं, सो तीसरा जगमोहन है।

ताके अंतर चौफेर आठ द्वार को किलाकार गर्भ मन्दिर है। तैसहीं श्रीराम यंत्रराज में प्रथम वाहेर को महाकमल बत्तिस दल को है। ताके अन्तर दूसरा कमल सोरह दल को है, पुनि तीसरा कमल बारह दल को है, चौथा कमल आठ दल को है, अरु पंचम कमल भी आठै दल को है। सोई मन्दिर के मध्य में अष्ट पहल सुवर्ण वेदिका है। ऐसो अद्भुत धाम है।।२८।।

# ॥ मूल ॥

# स्वर्ण वेदिका मध्य तहाँ एक रतन सिहासन । सिहासन के मध्य परम अति पदुम सुभासन ।।२६।।

अर्थ—सो वेदिका विपुल प्रकाशमय महामनोहर रची है। तहाँ वेदिका पर एक नाम मुख्य अद्वितीय रत्न सिंहासन है। राजसिंहासन को जो आसन होय, ताको सिंहासन कहियो सो यह रत्नौ ते रचित श्री सीता समेत रघुराज किशोर सिंह को आसन है।

अष्ट पावन युत अष्टकोण है। पावन प्रति सिंह के सावक सोहते हैं।

तेहि सिंहासन के मध्य में अति परम पद्म को अर्थात् अति परम दिन्य अष्टधा प्रकृति अरु अणिमादि अष्ट सिद्धिनमय अष्टदल कमल को शुभ आसन है। कोई सहस्र दल कमल कहे हैं, परन्तु तापनी, स्वराज अरु श्री अग्र स्वामी के अष्टयाम में अष्ट-दलैं है।।२९॥

# ॥ मूल ॥

# ताके मध्य सुदेस कर्णिका सुन्दर राजे। अति अद्भुत तहँ तेज विह्न सम उपमा भ्राजे ॥३०॥

अर्थ—ता कमलासन के मध्य सुदेस नाम सुन्दर मध्य भाग में कर्णिका का नाम बीच की बेदी सुन्दर है। अर्थात् चिन्मय परा प्रकृति जीवतत्व प्रकाशरूपा राजै है। ता कर्णिका के बीजापंचाशत वर्ण कहे हैं। ग्रंथान्तरौं में तहाँ कमल कर्णिका में अति अद्भुत विह्न नाम अग्नि सम उपमा को तेज भ्राजै है।

अर्थात् प्रथम सूर्यं, पुनि चन्द्र, पुनि अग्नि मुद्रा हैं। परन्तु नीचे रिव सम तेज हैं; अरु ऊँचे अग्नि सम तेज है। बीच में चन्द्र सम तेज है, ताको श्वेत वर्ण अग्नि सूर्यं तेज में मिलि गयो। केवल विह्न सम देखि पड़े है। तीनों मिले हैं। ताही ते अति अद्भुत तेज है।।३०।।

## ॥ मूल ॥

# ता मधि सोभित राम नील इन्दीवर ओभा। अिलल रूप अंभोधि सजल घन तन की सोभा।।३१।।

अर्थ—ता मधि अर्थात् ता जीवतत्त्वरूपा त्रिविध तेजोमय अनूपा कर्णिका के मध्य में अखिललोक-लोचनाभिराम श्रीराम नील इन्दीवर नाम नील कमल की ओभा कहें आभा युक्त शोभित हैं।

भाव यह है कि नील कमल सम अमल तन सुगन्धि माधुरी मकरन्द ते स्वजन मन मधुपन को आनन्ददानशील हैं। शोभा के अनुप्रास हेतु आभा को ओभा कहे हैं।

कैसे शोभित हैं कि अखिल रूप अंभोधि अर्थात् रूपरूपी अंभ नाम जल के अधिप राजा हैं। रूप कित्ये—'नख ते शिख ताई सब अंग सुन्दर होयें बिन भूषण ही मानो विविध भूषण धारे हैं। निहारत ही नयन मन मधुमाखी सम फँस जायें जामें, ऐसी जो रूप, अखिल नाम सम्पूर्ण ब्रह्मांड में व्याप्त ताहू के कारण, रूप-रूपी सुधा के सिन्धु हैं। अर्थात् रूपानुरागी जीव जलचरन के जीवन अयन हैं। सिन्धु के मुख्य तीन धर्म हैं। अथाह, अपार, डुबावन हार, ते रूप में तीनो हैं। पुनि सजल घन के सम तन की शोभा है। भाव यह है कि सजल घन के सम गम्भीर श्यामल शोभा है। तेहि तन ते सुख सिलल बरषते हैं। अरु वचन विमल गरजन ते स्वजन मन मयूरन को हरष पूरन करते हैं। ३१।

#### ॥ मूल ॥

सिर पर दिव्य किरोट जटित मंजुल मिन मोती। निरित्त रुचिरता लिजित निकर दिनकर की जोती।।३२॥ अर्थ —श्री सुन्दर-शिरोमणि के शिर पर दिव्य किरीट मंजुल नाम महासुन्दर मणि-मोतिन ते जटित है। दिव्य कहे साक्षात् ब्रह्मा जी निज मन ते निर्माण किये हैं। मणि जटित हैं अरु सुराहीदार मोती ऊपर किनारे कलसी सम सोहै हैं।

ता किरीट की रुचिरता नाम प्रकाशमय सुन्दरता निरिष्त कै, निकर कहे समूह सूर्यन की जोती लिज्जत होती है। लिज्जत होने का हेतु यह है कि दिनकरों की जोति त्रिगुणमय मलीन है, अरु किरीट की जोति गुणातीत अति स्वच्छ है। पुनि रिव जोति तापकारी है। यह शीतल सुखकारी है अरु रिव जोति थिरता रहित उदय अस्त होती है, औ किरीट जोति थिर एकरस है। ताते किरीट की रुचिरता लिख रिव वृन्दों की जोति लाजती है।।३२॥

# ॥ मूल ॥

कुंडल लिलत कपोल जुगल अति परम सुदेसा । तिन को निरित प्रकास लिजत राकेस दिनेसा ॥३३॥

अर्थ-अति लिलत कुंडल अति लिलत युगल कपोल परम सुदेश में हैं। तिन कुंडलन को प्रकाश निरिख कै राकेश चन्द्र, अरु दिनेश लिजित होते हैं।

हेतु यह कि कुंडलों के मोतिन को प्रकाश निरिष्ठ चन्द्र अरु लालमणिन को प्रकाश निरिष्ठ सूर्य्य लिजित होते हैं; क्योंकि दोनों ते कुंडलों को प्रकाश विलक्षण है। अथवा तिन कपोलों को प्रकाश लिख चन्द्र औ तिन कुंडलों को लिख दिनेश लिजित होते हैं। कपोलों को चन्द्र की उपमा प्रसिद्ध है। अति परम एक अर्थ है। ताते लिलित के संग सम्बन्ध किया है और लिलित पद देहली दीपक सम कपोल कुंडल दोनों को प्रकाश देय है।।३३।।

## ॥ मूल ॥

मेचक कुटिल सुचारु सरोरुह नयन सुहाये। मूल पॅकज के निकट मनहुँ अलि छौना आये।।३४।।

अर्थ — अरु मेचक कुटिल सुचारु हैं। मेचक कहे काले अर्थात् वार इहाँ मेचक, यह वारों को गुण नाम है, ते मेचक वार कुटिल कहे घुं घुँ रारे हैं; सुचारु कहे सूच्छम चित्र-कारे हैं। अरु जो सिरोरुह पाठ राखिये, तो किरोरुह नाम केस मेचक, कुटिल, सुचारु हैं। यह अर्थ है। परन्तु पुस्तकों में सरोरुह पाठ है, ताते यह अर्थ किया है।

अरु सरोरुह कहे कमल सम नयन शोभायमान हैं, अर्थात् कमल सम रतनारे, विशाल विकसित, उजियारे, मोद मकरंद धारे, प्रीति पराग के अगारे, शोभा शील सुगन्धि सहित अति प्यारे हैं। यथा—

॥ सवैया ॥

वांके बड़े उमड़े सुखमा उपमा मृग खंजन मीन लहे ना। छाल सितासित रंग भरे 'रस रंगमनी' मनमोहन पैना।। सुन्दर शारद सारस के सम सील रसील सुशील के ऐना। नैनन मेरे बसैं नित जान जियावन जानिक नाथ के नैना।।

अरु ते घुँ घुँ रारे वार कपोलन के पास कैसे सोहै हैं कि मानो परम प्रफुल्लित पंकत हैं। ताके निकट अलि भ्रमर के छीना सुगन्धि मकरन्द्र हित आये हैं। कोमल के छल्ले छोटे छोटे हैं, ताते छीना कहे।।३४।।

#### मूल

भृकुटी त्रयपद दुगुन मनहु अिल अविल विराजे । नासा परम सुदेस वदन लिख पङ्काज लाजे ॥३५॥

अर्थ — श्री भानुवंश विभूषण जू को भृकुटी कैसी है कि त्रयपद-दुगुन कहे षटपद अर्थात् अनरों की अली नाम अनरीन की मनहु पंगति विराज है। भाव यह है कि भृकुटी आगे मोटी हैं ते मानो अनरा हैं औ पीछे पतली हैं ते मानो छोटी छोटी अनरी हैं। इहाँ उतार चढ़ाव के उपमा हेतु अनर अनरी दोनों की अवली कहे, अलि पद को केवल अनरी अर्थ — प्रमाण इन्हीं श्री अप्रस्वामी जी के अब्दयाम को इलोक —

"भ्रमरालिकुलैर्युक्ते पुष्पगन्धानुमोदिते । शुकशारिकामयूरैश्च कोकिलैरभिकुजिते ॥"

अर्थात् भ्रमर अरु अली भ्रमरी तिन के कुलों करिकै युक्तवन है। इस इलोक में अलि केवल भ्रमरीन को प्रगट है, ताते यह अर्थ मुख्य है। अरु मनोरंजनार्थ दूसरा अर्थ करते हैं।

त्रयपद कहे काल अर्थात् भूत, भिवष्य, वर्त्तमान एई हैं तीन पाद नाम विभाग अथवा लक्षण जिसके ऐसे त्रयपद नाम काल को दुगुण नाम उत्पन्नता लीनता ए दोऊ गुण हैं जिन भृकुटिन करि कै, ते भृकुटी कैसी है कि मनहु अलि वृन्दों की अविलि विराज हैं। इति।

अरु नासा परम सुदेश नाम परम सुन्दर है अर्थात् तिल-प्रसून, काम-तूण, शुक-तुंड, आदि की शोभा जाके आगे भदेश है। तैसही श्री विदेहजा विहारी को विमल वदन लिख कै पंकज लाजै हैं; क्योंकि कीच का पुत्र है अरु क्षण ही में मुरझाय है ॥३५॥

#### मूल

चितविन चारु कृपाल रिसक जन मन आकर्षत । मंद हास मृदु वचन जनन को आनंद वरषत ॥३६॥

अर्थ — अरु चितविन चारु कृपाल है, चारु (सुठि सुन्दर) कृपा करि कै अल कहै पूरण है। सो रसीली चितविन के रिसक जे श्रृङ्गारी सखा दासादिक जन हैं, तिनके मनौं को आकरषत कहे खींचि लेय हैं। किसी के मन को केवल चारुतै ते, किसी के मन को केवल कृ गालुतै ते, किसो के मन की दोऊ करिकै खैं वि के निज वश करि लेग हैं। अरु मंद हास, मृदु वचन तो रिसक, अनरिसक, वालवृद्धादि सब स्वजनौं को आनन्द वर्ष हैं। मानो मैथिली वल्लभ महा मञ्जुल मेघ निज मन्द हँ भनि दामिनी दमकाय, मृदु वयन मधुर धुनि सुनाय, आनन्द वारि वरपाय, स्वजन सालि समूहों को हरे करि हरषाय रहे हैं।।३६॥

# ॥ मूल ॥

दीरघ दीप्त ललाट ज्ञान मुद्रा हढ धारी। सुन्दर तिलक उदार अधिक छवि सीमित भारी।।३७॥

अर्थ — अरु हढ़ ज्ञानमुद्राधारी श्री सीताविहारी जी को ललाट दीरघ कहें विपुल विशाल है। अरु दीप्त कहे परम प्रकाश युत है। ज्ञानमुद्रा दृढ़धारी कहिये स्वराज्य सिंहासन में विराजमान मन को अखंड ज्ञान मुद्रा नाम आकृति ते मुद्रित करि के निज महिमा स्वानन्द शान्ति में दृढ़ स्थित है। यह मुद्रा आप की स्वरूपानुभव रूपा है, परन्तु मुक्त जीवों को अति दुर्लभ है, बिना कृपा सामान्यों की कहना क्या है?

पुनि दूसरी ज्ञानमुद्रा यह है कि दक्षिण हाथ को अंगूठा तर्जनी में मिलाय के तीनों अंगली पसारि पसारि देना अरु हाथ को हृदय के सामने थिर करि मन दृष्टि भी थिर रखना। यह मुद्रा भी श्री राम ध्यानों में प्रसिद्ध है।

पुनि तेहि ललाट में सुन्दर पीत अरुण उदार (कहे स्मरण मात्र ते मनोरय पूरक)
तिलक है। सो उदार तिलक की अधिक छिव ते ललाट भारी शोभित है। तिलक
का कोई आकार नहीं कहे; परन्तु साम्प्रदाय ग्रंथों में लिखा है कि श्री गुइन ते अपने को
जैसा तिलक मिला होय, तैसहो प्रभु के ध्यान करैं अरु अर्चा स्वरूपों में धारण भी
करावै।।३७।।

#### ॥ मूल॥

परम लिलत मनिमाल हार मुक्ता छवि राजे। उर श्रीवत्स सुचिह्न कंठ कौस्तुभ मनि भ्राजे॥३८॥

अर्थ — जब ध्याता जी की दृष्टि ललाट ते उर कंठ में आई। सो कहते हैं। कंठ ते उर लीं परम लिलत मिणन को माला अरु मुक्ताहारन की छिव राजै है नाम प्रकाश सिहत सोहे है। और उर में दक्षिण भाग में महापुरुष लक्षण महासीभाग्यज्ञापक इवेत रोमों की भ्रमरी सात के अङ्क सम दिक्षणावर्त श्रीवत्स चिह्न भ्राजै है। ताके ऊपर कंठ में लाल कमल सम रंग को कौस्तुभ मिण भ्राजै है (अति प्रकाश करे है")। श्री वत्स कोई महानुभाव पीतरंग कहे हैं, परन्तु श्री पराशर भट्ट श्री विष्णुसहस्रनाम भाष्य में स्वेत ही कहै हैं। अरु कोई वाम और भी लिखते हैं। १३८॥

### ॥ मूल ॥

# जग्योपवीत सुदेश मध्य धारा जु विराजे। उभै भुजा आजानु नगन जटि कंकन राजे।। ३६।।

अर्थ-यज्ञोपवीत पीत सुदेस नाम सुन्दर मध्यभाग में वाम कंधे ते दिहन किट लों धारा ज्यों विशेष राजै है अर्थात् नील शैल में जैसे पीत पराग रंजित सरित राजै तैसे सोहे है। अरु उभय नाम दोऊ भुजा आजानु कहे जानुपर्यन्त लम्बी हैं। तिन में नग अमोल मणिन ते जटित कङ्कण राजै है।।३९।।

#### ॥ मूल ॥

चूनी रतन जराय मुद्रिका अधिक सँवारी। सोभित अद्भुत रूप अरुन की छवि अनुहारी।।४०।।

अर्थ—तिन भुजान की करांगुलीन में चुन्नी रतनों के जड़ाव ते जड़ित मुद्रिका अधिक सँवारी है। अधिक सँवारी को भाव यह है कि रत्न कहे हीराजड़ित ताके अंतर चुन्नी के चिन्मय श्री रामनाम है। ताते लोक के मुद्रिकों ते अधिक अलौकिक सँवारी है। अतएव सो मुद्रिका अद्भुत रूप शामिल है। अरुण (सूर्य) के अनुहार तेजोमय छिव है।

#### कवित्त

सरधन् धरन दरन दुख दीनन के,

भरन करन विश्व भर के उदर के।

सुरसा सुवन से है दादुर दुवन के,

विभूषन भुवन के वरद हरि हर के।

मंडित हैं रसराम अंगुलिन अभिराम,

रामनाम अङ्कित त्यों मुद्रिका सुघर के।

मिन से नखर के वरन दिनकर के,

सुकंज सोभा सर के हैं कर सियवर के।

अथवा अद्भुत रूप श्री रामरूप ही को विशेषण है। किरीट मुद्रिकादिकों की शोभा ते शोभित रूप अद्भुत है। छवि अरुण की अनुहारि नाम प्रकाशमय है।।४०।।

## ॥ मूल ॥

भूषन विविध सुदेस पीतपट सोभित भारी। लसत कोर चहुँ ओर छोर कल कंचनधारी।।४१॥

अर्थ — मुख्य भूषणों को किह कै अब अनेक उपासकों के रुचि अनुरूप और भूषण कहे देते हैं। भूषन विविध (अनेक प्रकार के) सुदेस कहे सुन्दर तथा सुदेस (श्री राम-के अङ्ग सुदेशों में हैं) जैसे नाभि के ऊपर नव रतन रचित श्री रामनाम खचित चौकोन

पदिक है। बाहून में विचित्र विजायठ है, बनमाला है, इत्यादि अनेकन भूषण शोभित हैं, अरु पीतपट अर्थात धोती किट मंडल में सोभित है। अरु पीत उपरना अंशदेशन ते किट लों लिलत लटके हैं। तिन पटों में चहुँ ओर कोर कहे अरुणारी किनारी अरु कल (सुन्दर) कंचन सूत की धारी लसती है। अरु उत्तरीय में जरतारी के छबीले छोर छहरे है। सो पीतपट प्रभु के श्यामलांगों में भारी कहे बहुत शोभित हैं अर्थात् जैसे तरुण तमाल तरु पर प्रफुल्लित पीत लता सोहै, पुनि श्यामलमणि शैल पर जैसे प्रभात के प्रभाकर की प्रभा सोहै तथा श्रृंगाररस रूपी नद में जैसे शोभा की सरित सोहै, तैसे इन तीनों ते भारी शोभित हैं, मानो सियाजू के देह की दुति वल्लभ वपु अनुकूल दुक्ल बनि कै विलसे है। १४९॥

#### ॥ मूल ॥

# रोमाविल बिन आइ नामि अस लगति सुहाई। त्रिवली तामिध लिलत रेख त्रय अति छवि छाई।।४२।।

अर्थ — रे मावली की लीक सूच्छम लिलत नील हृदय ते नाभि लौं अति बिन आई है। अरु नाभी अस कहे अति शोभायमान लागती है। दिहनावर्त्ती गंभीर है। औ उदर में त्रिवली हैं, जिन्हें लोक में पेटी कहते हैं। ता त्रिवली के मध्य में लिलत तीनौं रेखा हैं; तिन की छिव उदर में छाय रही है ॥४२॥

### ॥ मूल ॥

# कटि परदेस सुढार अधिक छवि किंकिनि राजे । जानु पुष्ट बनि गूढ़ गुल्फ अति ललित विराजे ॥४३॥

अर्थ — श्री कौश रेन्द्र लाल को किट प्रदेश सुढार कहे गोल पातर उतार चढ़ाउ है। तामे कंचन मणि जिटत कल धुनि करिन किंकिणी राजती है, ताकिर कै किट की अधिक छिन है। किट के नीचे नितम्ब ऊरु जानू परम पृष्ट गोल बनी है। तैसेही जानू के नीचे के भाग भी गोल चढ़ाउ उतार हैं और गुल्फ एँडिन के ऊपर की गाँठें गूढ़ छिपी हैं, ताते अति लिलत निशेष राजें हैं।।४३।।

### ॥ मूल ॥

# नूपुर पुरट सुचार रचित मनि मानिक सोहैं। रव कल सुर संगीत सुनत परिजन मन मोहै।।४४॥

अर्थ — वाही ठौर त्पुरु पुरट (सोने के) सुचार (सुठि सुन्दर) नीचे हरित मणि ऊपर लाल रंग मानिक जटित रचित सोहते हैं। तिन को रव नाम शब्द कल कहे मधुर मनोहर सुरीं के संगीत सम हैं, सो रव सुनत संते परिजन कहे पासवर्ती परिकर परिवारों के मन मोहि जाते हैं अर्थात् तदाकार अचल ह्वै जाते हैं।।४४।।

#### ॥ मूल॥

# जुगल अरुन पद पद्म विह्न कुलिसादिक मंडित । पद्मा नित्य निकेत शरणगत भव भय खंडित ॥४५॥

अर्थे—श्री जानकीकांतजी के युगल पद अरुण पद्म (कमल) सम कोमल सुगन्धि-युत हैं। अरु कुलिस कहे वज्र है आदि में जिनके, ऐसे जे अरतालिसो चिह्न, तिन करिकै मंडित (भूषित) हैं। ते अरुण पद्म, सम श्री रामपद श्रीपद्मा (लक्ष्मी जी) के नित्य ही निकेत गृह हैं। अर्थात् शोभा रूपा अरु चिह्नस्वरूपा लक्ष्मी जी सदा वास करती हैं।

अरु शरणागत जनों की भव भय खंडित हैं जिन्हों किर के ऐसे हैं अर्थात् श्री राम-चरणों को शरण कहे रक्षक मानि जे जन गत कहै प्राप्त ह्वैं के प्रणाम करते हैं, तिन की भव (संसार) की भय जन्म मरण रूप खंडित हो जाती है। ते जन अभय पद पावते हैं ॥४५॥

# ॥ मूल ॥

दक्षिण भुज सर सुभग सुहावन सुन्दर राजे। दिव्यायुद्य सु विसाल वाम कर धनुष विराजे।।४६।। अड़तालिस चिह्नौं के वर्णन।। कवित्त ।।

ध्यावै रसराम रामपद चिह्न दाहिने में,

करध सुरेखा मन स्वस्तिक सुआनि कै।

अष्टकोन रमा हल मूसल सरप पर,

अंवर जलज रथ वज्र जव जानि कै।

कल्पवृक्ष अंकुस ध्वजा मुकुट चक्राज,

आसन सु जमदंड जम भीति भानि कै।

चामर सुछत्र नर जव माला एई अंक,

सीय पद वाम में विलोकत बखानि कै ॥१॥

राम वाम पद विह्न ध्यावै रसराममणि,

सरजू सुगोपद सुभूमि उर आनि कै।

कलस पताका जम्बूफल अर्द्धचन्द्र शंख,

षट कोन त्रय कोन गदा जीव जानि कै।

बिन्दु शक्ति सुधा कुंड त्रिवली त्यों मीन मंजु,

पूरो चन्द्र वीन वंशी धनु सुख सानि कै।

न्तूण हंस चन्द्रिकादि एई अंक सीय पद,

दाहिने में देखत महान मोद मानि कै ॥२॥

श्री दीनजन रक्षकजी के दक्षिण भुज में शर (वाण) सुभग सुहावन सुन्दर ये तीनों एक अर्थ के पद हैं। तिन की पुनरुक्ति सम्बन्ध ते मिटती है। सुभग भुजा में सुन्दर शर सुहावन राजे है, नाम प्रकाश करे है, एक सुभगता भुजा की, दूजी सुन्दरता शर की, तीसरी सुहावनता भुजा में शर धारण की है।

किन्तु सुभग पंख, सुह वन डांडी, सुन्दर फरयुत शर राजे है, सो कहे सुन्दर विशाल वाम कर में सुविशाल दिव्यायुध धनुष विराजे है, सुविशाल देहली दोपक पद है। भुजा आयुध दोनों को प्रकाश है।।४६।। (श्रो धनु अ वाग के कवित अन्तिम पृष्ठ में देखिये।

# ॥ मूल ॥ 🥛

# षोडस वरस किशोर राम नित सुन्दर राजें। राम रूप को निरित विभाकर कोटिक लाजें।।४७॥

अर्थ—गोडश कहे सोरह वर्ष के नित नाम नित्य सदा अखंड एक रस द्विभुन स्थाम सुन्दर श्रो रामिकिशोर विष्रह साक्षात् श्रुङ्गार रस सिन्धु राजते हैं अह श्रो राम रूप को निरित के विमाकर कहे सूर्य कोटिन लाजते हैं। लाजने के हेत यह है कि सूर्यन को प्रकाश त्रिगुणमय अह ग्रहणादिकों ते ग्रस्तमान है अह काल के वेग ते निरस्त है। अह श्री राम रूप को प्रकाश तीनौं गुणन ते परे कालादिकों ते अबाधित है। ताते कोटिन विभाकर लाज हैं सो श्रुतिन भी कहै।

तत्र श्रुति :—

न तत्र सूर्यो भाति न चन्द्रतारकं नेमा विद्युतो भान्ति कुतोऽयमग्निः । तमेव भान्तमनुभाति सर्वं तस्य भाषा सर्वमिदं विभाति ॥ २।२।१५ इति कठोपनिषदि

श्री रामचन्द्र जी सो रह वर्ष को अवस्था नित्य रहे हैं और देवताओं को २५ वर्ष. नित्य रहे हैं ॥४७॥

# । मूल । १५० वर्गे अस्त्रमण

# अस राजत रघुवीर धीर आसन सुलकारी। रूप सिचदानन्द वाम दिसि जनक कुमारी।।४८॥

अर्थ — अब श्रीराम विग्रह को ध्यानपूर्ण करते हैं; अरु श्री जनकिशोरी जी को ध्यान कहैंगे। अस अर्थात् 'ता मधि शोभित राम' इहाँ ते लैंके जस ध्यान कहि आये तस श्री रघुत्रोर अर्थात् पंच प्रकार की वारता में विख्यात; त्यागत्रीर, दयावीर, विद्यावीर, धर्मवीर, पराक्रमवीर।

अरु सचिदानन्द रूप कहे सत् चित् आनन्दधन विग्रह अरु घोर घोरोदात्त नायकौं

के लक्षणों ते युक्त स्वजन सुखकारी सुख आसन ते राजते हैं नाम प्रकाश युत सोहते हैं। श्रीराम रूप शुद्ध सिच्चिदानन्द विग्रह है। तामे प्रमाण श्रीरामतापनी की श्रुति।

> ''रमन्ते योगिनोऽनन्ते नित्यानन्दे चिदात्मनि । इति रामपदेनासो परंब्रह्माभिधीयते ॥'' तथा—''अर्द्धमात्रात्मको रामो ब्रह्मानन्दैकविग्रहः ।'' इति

भाषा रामायणेऽपिः—

"चिदानन्दमय देह तुम्हारी। विगत विकार जान अधिकारी अर्थात् श्रीराम तत्व-परत्व के ज्ञाता सरस उपासक रूखे ज्ञानवादी नहीं।

पुनः "अस राजत रघुवीर धीर आसन सुखकारी" को भावार्थ। मानो धीर अर्थात् शान्त रस अचल आसन में वीर रस वेष कें सुखकारी श्रृंगार रस राजें हैं अर्थात् वीरता, धीरता, सुखदता ते पूर्ण सुखासन ते विराजे हैं दिहने ऊरु के नीचे वाम चरण अरु वाम ऊरु के ऊपर दिहना चरण धिर कै बैठे हैं। यही को सुखासन नाम है।

अरु श्री रघुवीर के वाम दिशि सिन्चदानन्दरूपिणी जगदानन्ददायिनी आदि-शक्ति श्री जनककुमारी जी विराजती हैं। रूप सिन्चदानन्द पद काकाक्षिगोलक न्याय ते श्री रघुवीर जनककुमारी दोऊ स्वरूपन को विशेषण है अर्थात् जैसे काक को एक ही गोलक दोनों नेत्रन को रूप बोधक है, तैसे रूप सिन्चदानन्द पद है। इहाँ जैसे राजमाधुरीमय रघुवीर नाम कहे, तैसे मधुर मञ्जुल जनककुमारी नाम कहे। यामे माधुट्यं लीला की नित्यता जानिये। अरु एक ही पद रूप सिन्चदानन्द युगल को विशेषण दिये। यामे तत्त्व की एकता जनाये।

अरु रूखे मतवादी जे जड़ प्रकृति माया मिथ्यादि मानते हैं, तिनके मतों को निषेध करिके, श्रीरामतापनी बृहदारण्यकादि उपनिषद सिच्चिदानन्द रूपवती कहे।

> तेत्र प्रमाण श्रीरामतापनीय श्रुतिः । हेमा मया द्विभुजया सर्वालंकृतया चिता ॥

अर्थ-चिता कहे चित्स्वरूपा सीता करिकै युक्त हैं। पुनः वृहदा० "स इमेवा-त्मानं द्वेद्या पातयत्ततः पतिश्च पत्नीश्च भवतामिति श्रुतिः।"

सो सच्चिदानन्द परात्मा पूर्वोक्त इस अपने आत्मा को दो प्रकार आपातयत् नाम करते भये । तिस कारण से पित-पत्नी दो रूप भये ।।४८।।

# ।। श्री प्रियाजी का नख-शिख।।

।। मूल ।। नगन जरे छिब भरे विविध भूषन अस सोहैं। सुन्दर अंग उदार विदित चामीकर को हैं।।४६॥ प्रसंग—किव कुपाल की श्री राम रूप ते दृष्टि श्री जानकी रूप में आई। सो विविध भूषणौं ते युत सर्वांग प्रकाश विलोकि कै, पुनि जैसे शिरते प्रभु को ध्यान कहे, तैसहीं कहते हैं।

अर्थ — सो श्रो जनककुमारी के सिचवानन्द रूप में विन्मय नगन ते जड़े, छित्र ते भरे, विविध (अनेकन) भूषण अस कहे अति सोहते हैं। अस शब्द देश भाषा में अतिशय को कहते हैं। जैसे क्या कहैं अस सुन्दर है नाम अक्रय सुन्दर है। सो ग्रंथ में बहुत ठोर है, तहाँ अतिशय अर्थ है। अरु शिर ते पद लौं अङ्ग सुन्दर उदार विदित हैं अर्थात् श्रों की भो श्रों है। यथा—

(चौपाई)ू

"सिय सोभा किमि जाय बखानी। जगदम्बिका रूप गुन खानी।"

जो श्री रामरस भरित गीरांगी को सुत्रर्ण सम कहै, तो चामीकर (सुत्रर्ण) को है। श्री अंगीं के आगे कौन वस्तु है। मायिक, जड़, कठोर, किल को नित्रास।

।। मूल ।। अलक झलकता स्याम पीठ सोमित कल वेनी । सुन्दरता की सींव किथौं राजित अक्रि श्रेनी ।।५०।।

अर्थ — अलकें दोनों श्रवण समीप सूच्छम रची लहरें हैं। ते झलकता युत अर्थात् चिलकारो श्याम हैं। श्याम पीठ पर कल कहे कमनीय वेनी शोभित है। तिनकी विकलगोपमा कहते हैं कि ये तीनों सुन्दरता की सींव कहे मर्यादा हैं। किधौं अलि (भ्रमरों) तिनको श्रेंणी नाम पाँति राजती हैं। अयवा अलकें हैं किधौं मुब मुन्दरता रूप राज्य की दोनों सीमा हैं।

अरु पीठ पर वेनी है किथौं कंचन की कदली के पत्ता पर भ्रमरों की पाँति राजती है ॥५०॥

# ॥ मूल ॥

रिवत सुविविध प्रकार माँग जरतार सँवारी।
मनहुँ सुरसरी धार बनी सोभा अस भारी।।५१।।
पाटन की लर और बड़े-बड़े उज्जल मोती।
सघन तिमिर के मध्य मनो उडगन की जोती।।५२॥

अर्थ —श्री जनकतनया महा भाग्यवती जू की माँग जरतार ते सँवारी विविध प्रकार ते रिवत हैं। अर्थात् सुवर्ण सूत्रौं ते अरु छोटी मोतिन ते रिवत हैं। तिन मोतिन के लड़न को उपमा कहते हैं कि अस कहे अतिशय भारी शोभा बनी है, मानो सुरसरी की धार है। भाव श्रो रघुनन्दन को मन मातङ्ग जामें सदा क्रोडै है।।५१॥

और माँग के ऊपर वेनी के मूल में तथा वेनों के छोर में नोल रेशम के संग बड़े-

बढ़े सेत मोती गुहे हैं, तिनकी कैसी शोमा होती है कि मानो सघन तिमिर नाम अंधकार के बीच में उडगण नाम तारागणों की जोति चमकै हैं।।५२।।

। मूल ।।
रतन रिचत मिन जटित सीस पर विदा छाजे ।
लिलत कपोल सुजुगल करन ताटंक विराजे ।।५३॥
उज्जल भाल सुचार अमित उपमा अस सोहै ।
राजत परम सुहाग भाग को भवन किधों है ॥५४॥

अर्थ—रतन नाम सुवर्ण। अर्थात् सब धातुन से श्रेष्ठ जिन वस्तुन में होय, सोई रत्न कहावै है। ताते रचित अरु बहु रङ्ग मणि जड़ित विदा कहे वेदा श्री सिया जू के शोश पर छाजै है। अरु युगल कपोल अति ललित है, तथा करण में तार्टक जिन्हें लोक में तरीना कर्णपूल कहते हैं, ते विशेष राजै है अर्थात् नीचे झुमका भी सोहते हैं। ।५३।।

श्री भूमिसुता जू को भाल उज्जल कहे प्रकाशमान है औ सुचारु (सुठि सुन्दर) अमित है। ताकी उपमा ऐसी सोहती है कि परम सुहाग को भवन राजत है, किधीं भाग को भवन राजत है।

सुहाग नाम प्राणप्रिय पति को नित्य प्रेम अरु भाग माइके सासुरे में धन, जन, परिवार की पूर्णता। तिन दोनों शुभ लक्षणों को भाल भवन है।।५४।।

॥ मूल ॥

गोरोचन को तिलक लिलत रेखा बिन आई। उन्नत नासा सुभग लसत वेसरि जु सुहाई।।५५॥ भृकुटो नयन विसाल सौम चितविन जग पावन। मानहुँ विकसित कमल वदन अस लगत सुहावन।।५६॥

अर्थ — पुनि तेहि भाल में अति लिलत गोरोचन को तिलक रिचत है। तेहि रचना की रेखें बिन आई नाम शोभित है। गोरोचन पीत रंग अति सुगन्धित भाग्यवती गऊ के निकसे है।

अरु उन्नत कहे ऊँची सुढार सुभग (सुन्दर) नासिका है। तामे सुहाई अर्थात् सुवरण, मणि, मोतिन ते रचित अति हलकी वेसरि लसती है।।५५॥

भृकुटी औ नयन दोनों विशाल हैं। तिन नयनन की चितविन सौम्य नाम सूधी, श्रीतल, कृपा अमृत भरी अपावन जगत को पावनकारी है।

अरु प्रसन्न वदन अस सुहावन लागत है कि मानौ विकसित कमल है ॥५६॥

॥ मूल ॥

अरुन अधर तर दसन पाँति अस लगति सुहाई। चारु चिबुक बिच तनक विन्दु मैचक दृवि छाई।।५७॥

# कंठपोति मनिजोति सुछवि मुक्ता वर माला। पदिक रचित कलधौत विराजत हृदय विसाला ॥५८॥

अर्थ — अरु अरुण अति मधुर अधर है। तिनके तरे दसनन की पंगति अति सुहाई लागती है। औ चारु (सुन्दर गोल) चिबुक (ठोडी) है। ताके बीच में तनक (सूच्छम) विन्दु मेचक कहे श्रीराम रसरंग सम स्याम हैं। ताकी छवि छाय रही है।।५७।।

श्री जनक किशोरी जू के कंठपोति कहे कंठ में पृक्त अर्थात् कंठ में मिली सटी भई मणि कहे इन्द्रनील मणि की कंठिका, जोति नाम प्रकाशयुत, ताकी सुछवि छाय रही है। इहाँ पोति शब्द पृक्त शब्द को अप भ्रंश है।। यथा

''सिय तोरे गोरे गरे, पोति जोति छवि छाय। मनहुँ रंगीले लाल की भुजा रही लपटाय।।

—इति श्रीनेहप्रकाशिकाया**म्** 

अरु विशाल हृदय में वर श्रेष्ठ मुक्तान की माला है। ताके बोच कलधौंत कहें सुवर्ण रचित मणि जटित पदिक विशेष राजत (सोहत) है ॥५८॥

#### ॥ मूल ॥

हेम तंतु कर रचित अरुन सारी रॅंग झीनी। कंचुकि चित्रित चतुर विविध सोभित रॅंग मीनी।।५९।।

अर्थ — अरु हेम कहे सुवर्ण के तंतु नाम सूतौ करके रचित झीनी अरुण रंग की साड़ी है। अर्थात् सुवर्ण सूत्रौ ते किनारी बेलि बूटे रचित हैं। अरु अरुण रंग अनुराग को है। ताते अनुराग उपजावन साड़ी धारे हैं।

अरु कंचुकी चतुरों की चनुराई ते विविध प्रकार चित्रित है। अर्थात् सोन सूत और सूच्छम मोती मणिन की कणिन ते कोर किनारी फल अरु हार आदि अनेकन भूषणों के चित्र रचित हैं। पुनः रंग भीनी कहे, मानो रंग से भीजी भई चुचाती है।

ऐसी कंचुकी साड़ी के अन्तर शोभित है। रंग पीत है, सो अंग में मिलि गयी है, किन्तु श्री राम सम क्याम है अथवा अरुण सारी में हरा रंग भी खुलै है। यथा रुचि होय।।५९॥

#### ॥ मूल ॥

वर अंगद छवि देत बाँहु अस लगित सुहाई। करन चुरी रंगभरी लिलत मुँदरी बिन आई।।६०॥ पद्मराग मणि नील जिटत युग कंकण राजै। मनहु वनज के फूल दुरेफन पंक्ति विराजै॥६१॥

अर्थ—वर (श्रेष्ठ) अंगद (बाजूबन्द) छिव को देती हैं, जिन में ते वाँहु अति सोहाई लागती है। अरु श्रीकर कंजन में इयाम रंग भरी मणिन की चूरी चमकती

हैं तथा मांगलीक अंगुलिन में लिलत मुंदरी बिन आई है। लिलत औ बिन आई को तात्पर्यं यह है कि अंगूठे की मुंदरी में अमोलक आरसी है औ अंगूठे की समीपिनी में श्री रघुवर की मधुर तसवीर है अरु मध्यमा की मुंदरी में निज तसवीर है। अपर रत्नों से जिटत है।।६०।।

पद्मराग कहे अरुण मणि और इन्द्रनील मणिजटित दोनों हाथों में दो-दो कंकण, जिन्हें लोक में कंगना कहते है, ते राजते हैं। सो अरुण कंगना मानो वनज को फूल है। तापर नील कंकण मानो दुरेफ (भ्रमरों) की पंगति विराजै है। कमल कंकण की समता रंगमात्र की है, आकार की नहीं।।६१।।

### ॥ मूल ॥

लहँगा कटि परदेस भाँति अति सोभित गहिरी । अरुन असित सित पीत मध्य नाना रँग लहरी ।।६२।।

अर्थ — किट प्रदेश कहे किट मंडल में लहाँगा गिहरी माँति कहे गंभीर प्रकार ते घने घर की अति शोभित है अर्थात् जाकी गिहरी भाँति में मन की वृत्ति डूब जाती हैं। आगे नहीं जाती। ताके मध्य में अरुण (लाल) असित (नील), सित, (श्वेत), पीत अरु नाना रंग कहे हरी, गुलाबी, बैगनी आदि की लहरी (धारी) अरु धारीन के बीच-बीच जरतारिन की बेलि बनी है।।६२।।

# ॥ मूल ॥

हरित नगन कर जरित युगल जेहरि अस राजै। तिन पर घुँघरू और अग्र विख्या सु विराजै ॥६३।

अर्थ हिरत नगन करके जिटत कंचन की युगल जेहरी युगल पदन में अतिशय राजती है। तिनके तरे घुंचरू अरु अग्र में अर्थात अंगूठन अँगुलिन में छबीली बिछिया सुविशेष राजती है।।६३।।

# ॥ मूल ॥

तिन पर नग जु अमोल लिति चूनी गन लाये। चरन तारु तल अरुन सहज ही लगत सुहाये॥ ६४॥

अर्थ — तिन बिछियान के ऊपर बीच में एक-एक अमोलक नग लाये (जड़े) हैं। तिनके चारों तरफ लिलत चुन्नी गण बहुत रंग के मिण की कणी समूह जड़ी है। अरु चरण चारु (सुन्दर) हैं। अर्थात् अड़तालिस चिह्नन ते चिह्नित है। ते चिह्न प्रथम श्री रामपद चिह्नन के संग ही वर्णन ह्वै गये हैं। अरु तल (तरवा) अति अरुण हैं। सहज ही अर्थात् बिना महावर दिये ही सुठि सु श्रु लागते हैं। १६।।

# ।। कवित्त ॥

जोहिये न जावक जपा वँधुँक विद्रुम में,

्रजोगुण नवल रसाल द्रुम दल मैं।

किंसुक सुमन में न वीरवधू तन में,

न वंदन कुसुँभ हूँ गुलाव गिरा जल मैं 🛊

विवहूँ के फर में न वाल दिवाकर में,

न रित के अधर में न् मंजुल कमल में। 🥕

ऐसी कोमलताई औं ललाई न सुहाई कहूँ,

जैसी 'रसरंग मनी' सीय पदतलें मैं।

# ॥ नखिशख उपसंहार ॥ ैं में

इस प्रकार श्री स्वामी अग्रदेव जो प्रयम दो पद ते वन्दना करि, अठ्ठाइस पद ते श्री अवध धाम सिहासनादि को ध्यान अठ्ठाइसी नरक की यातना निवारण को उपाय कहे।

पुनि तोस अंक ते जियालिस ताईं षोडश पद ते षोडशोपचार सम श्री राम ध्यान कहे।

पुनि एक पद में अवस्था औ अमित तेज प्रकाश की एकरसता कहे। अरु\_एक ही पद में युगल रूप की सचिवदानन्द औ संयोग किह कै सोरहै पद ते श्रो स्वामिनी ध्यान सम्पूर्ण किये। यामें युगलपरत्व औ निज प्रीति की समता जनायै।

अब दो पद ते उभय प्रभुन को प्रभाव अरु चार पद ते अंग ध्यान कहते हैं।

### ॥ मूल ॥

अतुलित युगल स्वरूप कवन अस उपमा तिनकी। जेतिक उपमा दीप्ति शक्ति करि भासित तिनकी ॥६५॥

अर्थ — जगत में जेतिक उपमा है, ते जिनको दोित शिक्त करिके भासित है, तिन की कवन अस उपमा है कि जो दोिजये अर्थात् कोई नहीं है। ताते युगल स्वरूप श्री सीतारामजी अतुलित (तुल्यता रहित) निरुपम है।।६५।।

## ॥ मूल ॥

यहि विधि राजत राम अवधपुर अवध विहारी । वंपति परम उदार सुजस सेवक सुलकारी ।।६६।।

।। यथा पद ।। 🐪

राम से राम सीता सो सीता । िशिव विरंचि शारदा शेष शुक्त पटतर खोजत कत्म व्यताता ॥ सुन्दर शील सुहाग अमित गुण अखिल लोक नर नारी जीता। अग्रस्वामि स्वामिनी उजागर नेति नेति श्रुति गावत गीता।।

६६ वें छःद का अर्ज-यहि विधि जेहि विधि पूर्व ही कहि आये तेहि विधि नित्यः श्री अवधपुर में अखंड अवध विहारी श्री राम सीतारमण राजते हैं।

कैसे हैं कि दम्पित नाम जायापित रूप हैं अर्थात् एक ही परमात्मा अवधपुर बिहार हेतु दम्पित विग्रह ते विराजते हैं। पुनि कैसे हैं कि परम उदार हैं अर्थात् श्री महाराज मिथिलेश जू को वात्सल्य रस सुख सम्पित्त दिये अरु श्री अवध मिथिला वासिन को बाल विवाहादिक लीला सुख सम्पित्त दिये तथा सुग्रीव विभीषणादि को लोक में राज्य, परलोक में अभयपद दिये। ऐसे ही श्री अवध निवासी चारों वर्ण पशु पिपीलिकादिकों को परम-पद दिये। ऐसे दम्पित श्री सीताराम परम उदार हैं। अरु अजहूँ यहि विधि परम उदारतादि संयुत सुयश कि ने सेवकों को सुखनारी हैं। अर्थात् जो जो सुख त्रेता में स्वर्य स्वरूप ते दिये, सोई सोई सुख सेवकों को केवल सुयश श्रवण मनन मात्र ते देनहारे परम उदार दम्पित हैं।

पुनि दूसरा अर्थ । यहि विधि राजत श्री राम अवधपुर अवध विहारी ।" दंपति जिनको सुयश परम उदार है अर्थात् शतकोटि रामसुयश है सो अपने एक एक अक्षर के उच्चारण ते महापातक ब्रह्महत्यादि तथा जन्म मरण को नाश करि के परमपद देने हारो-है । प्रमाणश्लोक "चरितं रघुनाथस्य शतकोटिप्रविस्तरम् । एकैकमक्षरं पुंसां महापातकनाशनम् ॥"

अरु परम उदार सुयश सेवकों को सुखकारी है अर्थात् जैसे श्री सीताराम जी त्रेताः में सुखकारी हैं, तैसे सुयश सुखकारी है।।६६।।

### ।। मूल ।।

दक्षिण भुज रिपुदलन गौर तन तेज उदारा।
उभय हेतु अनुसार घरे वृत लंडित घारा।।६७॥
शेष लिये कर छत्र भरते लिये चौर ढुरावें।
अनिल सुवन कर जोरि सुप्रभु की कीरति गावें।।६८॥

अर्थ—यहि प्रकार प्रधान अंगी ध्यान कि कै अब तदंग रूप परिवार ध्यान कहते हैं। श्री रिपुदलन जी गौर तन अखंडित धारा उदार तेज युक्त अरु उभय प्रभु श्री सीताराम जी के हेतु कहे सनेह रुचि के अनुसार वृक्त कहें तालवृंत अर्थात् पंखा दक्षिण भुज में धरे उभय प्रभुन के समीप वामदिशि विराजते हैं। इहाँ वृत शब्द तालवृंत के बोध जैसे उपवीत मात्र से यज्ञोपवीत को बोध होता है, तैसे जानना। यथा—"सीसनि टेपारे उपवीत पीत पट किट।" श्री गीतावली ॥६७॥

शेष नाम अखिलेश्वर शेषी परब्रह्म श्री रामांश शेषत्व श्री रघुकुल ललाम

लित लक्षण धाम दिव्य गुणागार श्री लक्ष्मण कुमार अत्रि कुमार ( चन्द्र ) मंडलाकार छत्र लिये छिव छावै है।

तैसही रामानुराग भाग भाजन भक्ताधिराज युवराज श्री रघुवंश विभूषण भरतजी चारु चौर ढुरावे है। अरु अनिल सुवन (श्री हनुमान जी) युगल कर कमल जोरि कै सुप्रभु को कीरति गावते हैं। यथा विनयपत्रिकायाम् पद—

महानाटक निपुण कोटि कविकुल तिलक गान गुन गर्व गन्धर्व जेता। पुनः

जयित सिंहासनासीन सीतारमण निरिष्ठ निर्भर हर्ष नृत्यकारी।।६८॥ ॥ मूल ॥

अपनी अपनी ठौर नित्य परिकर बनि भारी। सुरति शक्ति विमलादि रहत नित आज्ञाकारी।।६९।।

श्री सीताराम भरत लक्ष्मण शत्रुघ्न हनुमान ये मन्त्रराज के षट अक्षर समान हैं। इनका ध्यान करिक अब परिवार ध्यान कहते हैं। आपनी आपनी ठौर में नित्य सिच्च-दानन्द रूप अवध मिथिलाभिमान भावनाधारी भारी परिकर सखा, सखी, दास, दासी गणों की मण्डली बनी है। निज निज ठौर सेवा लिये सोहती है। अपनी अपनी ठौर यह पद पूर्व पर बोधक है। पूर्व मैं श्री भरतजी दाहिने, श्री शत्रुहन जी बायें, श्री लखन पीछे, श्री हनुमान जी आगे, औ पर मैं—सुरित विमलादि श्री सीतारामजी की शक्ति रूपा सखी युगल की आज्ञाकारी नित्य निकट रहती हैं। सुरित नाम श्री सीतारामजी को पराप्रीति रूपा सखी। अथवा सुन्दर रित प्रीतियुक्त विमलादि सखी श्री रामतापनी यंत्र में पूजित हैं।

तिन के नाम—विमला, उत्किषणी, ज्ञाना, क्रिया, योगा, प्रह्मी अर्थात् नम्रा, सत्या, ईशाना, अनुग्रहा—इति तैसहीं श्रीचारुशीला, श्रीचन्द्रकला, सुभगा, रूपकला, हेमा, क्षेमा, वाग्मी इत्यादि सब सखी रहस्य ग्रंथों में विदित हैं।।६९।।

### ॥ मूल ॥

जो जो जोहि अधिकार सिचव सेवा मन वासै। वीनाधर सुर तान गान करि प्रभुहि उपासै।। ७०॥

सखीन को सूचित कर अब सखादासों को कहते हैं। जो जो सचिव जेहि सेवा अधिकार पाये हैं तेहि सेवा विषे मन को वासै है।

सेवा के नाम—छत्र, चामर, व्यजन, दर्गण, आयुध, ताम्बूल, पुष्पमाला, जलपान इत्यादि ऋतु रुचि समा समय अनुकूल अमित सेवा हैं। सो जो जेहि सेवा को अभिलाषी है, सोई अधिकार पाय ताही सेवा सुख में मन को वासे है, नाम सुगन्धित करे हैं। दूसरी वासना नहीं करे। तथा और सेवान को निर्देश देखाउते हैं। कोई वीणा आदि बाजान को धारण करि स्वर सुधारि, तान लैके युगल यश गान करिके, उभय प्रभुक को उपासते हैं, नाम सेवन करते हैं।

सचिवन के नाम श्री अग्रस्वामी जी के अष्टयाम में हैं: — सुलोचन, सुभद्र, सुचन्द्र, जयसेन वरिष्ठ, शुभशील, अनंगजित, रसकेतु। ये सुमन्त्रादि आठौ मंत्रिन के पुत्र हैं। तैसही सखा श्री चारशीलमणि, श्रीवीरमणिजी, श्रीधीरमणिजी, हितमणिजी, रसराम-मणिजी इत्यादि सखा अरु मधुर दास अनेक हैं। 1901

# ॥ मूल ॥

यही ध्यान उर घरै स्वयं तन सुफल करेवा । भव चतुरानन आदि चरन बंदै सब देवा ।।७१।।

अर्थ यहि प्रकार सपरिवार ध्यान वर्णन करिकै, अब पांच पद ते ध्यान फल स्तुति कहि, पुनि पांच पद ते नीचानुसन्धान कहते ग्रंथ पूर्ण करेंगे।

जो यहि ध्यान उर नाम हृदय कमल मे धरै, आन नहीं, तो वा जन स्वयं तन कहें आपने तन को आप ही सुफल करै अर्थात् अन्तर्यामी ब्रह्म सहित जीव रूप बीज है। ताते तन वृक्ष भयो। ताको फल यही सांग श्री सीतारामजी को ध्यान है।

जो कोई कहै कि यही ध्यान क्यों धरै ? तापर कहते हैं कि भव ( महादेव ) चतु-रानन ( ब्रह्मा ) आदि सब देवता यही श्री सीताराम को ध्यान धरि इनहीं के चरण वन्दते हैं । अरु जो यह ध्यान धरै ताहू को बन्दे हैं । ताते यही ध्यान धरै ॥ ७१ ॥

#### ।। मूल ।।

यह दम्पति वर ध्यान रिसक जन नित प्रति ध्यावै। रिसक बिना यह ध्यान और सपनेहु निहं पावै।।७२॥

अर्थ-शिवादिक को साक्षी दै कै अब रसिक संतन की साक्षी देते हैं।

यह दिन्य दम्पित को वर नाम सब ध्यानन में श्रेष्ठ अर्थात् ऐश्वर्य अरु राजमाधुरो मिलित, तथा श्रुतिशास्त्रसम्मत, रिसकसंतभावना भूषित, सपरिवार श्री सीताराम जी को ध्यान, रिसक जन नित्य प्रति ध्यावै हैं। अरु रिसक सनेही बिना, यह ब्रह्मरस रूप ध्यान और रूखे लोग स्वप्नेहु में नहीं पावते ॥७२॥

## ॥ मूल ॥

अमल अमृत रस घार रिसक जन यहि रस पानै। तिहि को नीरस ज्ञान जोग तप छोई लागै।।७३।।

अर्थ — अपल कहे मायिक मल रहित अमृत रस की धारण धारा यह ध्यान है। अर्थात् दम्पित रूप अमल अमृत रसमय अयाह कुण्ड है। अरु महामधुर मुसक्यानि सरस कृपा कलित बोलिन विलोकिन आदि अमल अमृत रस धारा के रस ते पागे है। अर्थात् अन्तः करण ध्यानमय करें है। तेहि को ज्ञान आत्मा परमात्मा को एक मानना, योग निर्वीज शून्य समाधि, तप स्वर्ग सुख हेनु काय क्लेश—ये तोनों नोरस नाम श्रो राम भजन प्रेम रस हीन ऊख को छोई सम लागते हैं। यामे यह व्यंजित है कि श्रो राम भजन रस रहित जिनको ज्ञान योग तप निय लागे हैं ते ऊख की छोई खाने वाले पशु हैं। यथा—दोहा—

''रामचन्द्र के भजन बिनु, जो चह पद निर्वान । ज्ञानवंत अपि सो नर, पसु बिन पूछ विषान ॥७३॥

#### ॥ मूल ॥

परम सार यह चरित सुनत श्रवनन अघ हारी। ध्यान परम कल्यान सन्त जन आनेंदकारी॥७४॥

अर्थ — यह ध्यान वर्णन रूप चरित परम पवित्रता को सार है। श्रवणन में सुनत संते, सब पाप हरनहारो है। अरु ध्यान करत संते तो परम कल्याण नाम सरस मुक्तिकारी, अरु संत जनन को श्रवण ध्यान दोनो परमानन्दकारी है।।७४।।

### ॥ मूल ॥

तिन्हैं भूि जन कही कुटिलता पंक मिलन मन । यह उज्जल मिन माल पहिरिहैं परम रसिक जन ॥७४॥

अर्थ —श्री अग्रस्वामी अपने अनुगामिन को शिक्षा देते हैं कि कुटिलता रूपी पंक (कीच) ते जिनके मन मिलन हैं, तिन्हें भूलि कै भी न कहो । यह ध्यानमक्षरी उनको प्रिय न लागैगी; क्योंकि यह ध्यानमक्षरी उज्ज्ज्वल (स्वच्छ) मिण की माला है । ताते मिलन मन बारे याके अधिकारी नहीं हैं । याके अधिकारी परम रिसक जन अर्थात् स्वच्छ श्री सीतारामोपासक हैं । तिन्हें पहिरावना नाम सुनावना । ते आपनी सुमित रूपी ग्रीवा में पहिरैंगे नाम धारण करेंगे ॥७५॥

#### ॥ मूल ॥

जगत ईश को रूप वरनि कहि कवन अधिक मित । कहा अलप खद्योत भानु के निकट करैं दुति ॥७६॥

अर्थ—अब कार्पण्यता कहते हैं। जगत ईश श्री सीताराम जी को रूप मन वाणी के परे है। ताको वाणी ते वरणि कै कहै ऐसो जगत में कौन अधिक मितमान है। तापर दृष्टान्त देते हैं कि कहाँ सूर्य्य सम जगत ईश को रूप अरु खद्योत (जुगुनू) सम जीव की मिति! सो जैसे अति अल्प जुगुनू भानु के निकट नहीं दुित करै; तैसे जीव की मिति जगदीश के रूप को नहीं वरिन सकै।।७६।।

# ॥ मूल ॥

कहँ चातक की शक्ति अखिल जल चोंच समावै। कछुक बुन्द मुख परै ताहि लै आनन्द पावै।।७७॥

अर्थ—जगत ईश को रूप ध्यान वर्णन में नहीं आवै, तब क्यों वरणते हैं? तापर कहते हैं कि चातक (पपीहा) की ऐसी शक्ति कहाँ है कि जितना स्वाती को मेघ वरषै, तितना सब जल चोंच में समाय जाय; परन्तु जो कछुक बुन्द मुख में परै है, ताही को लैं को आनन्द पावत है। तैंसेही जीव की शक्ति नहीं है कि सब शोभा मित में समाय जाय; परन्तु जो कछू छिव की छीट आभास मित में आय जाय है, ताही में आनन्द पाय के कृतकृत्य होय है।।७७।।

#### ॥ मूल ॥

सुनि आगम विधि अर्थ कछुक जो मनिह सुहायो । यह मंगलकर ध्यान जथा मित वरिन सुनायो ॥७८।,

अर्थ — आगम नाम तंत्रसंहिता अर्थात् सुन्दरीतंत्र श्री अगस्त्यसंहितादि तिन में जो ध्यान की विधि है, सो श्रो गुरु संतन ते सुनि कै, तिन आगम ग्रन्थन को अर्थ जो कुछ सुहायो नाम प्रिय लाग्यो अर्थात् शास्त्र रीति श्री गुरु वाक्य निज निश्चय मिलाय कै, यह मंगल मूल को ध्यान जनन को मंगल करनहारो यथा मित अपनी मित के अनुसार वरनि के ध्यानाभिलाणी जनौं को सुनायो है।।७८।।

### ॥ मूल ॥

श्री गुरु सन्त अनुग्रह ते अस गोपुर वासी। रसिक जनन हित करन रहिस यह ताहि प्रकासी।।७९॥

अर्थ — किसने वरिन सुनायो है ? सो श्री किव कृपानिधि जी साक्षी रीति ते निज भावना रूप अरु शरीर को नाम जनावते हैं। श्री गुरु सन्तन की अनुग्रह ते अस गोपुर वासी, अस कस ? कि जस पूर्व किह आये हैं तस।

"अवधपुरी निज धाम परम अति सुन्दर राजै" इत्यादि अर्थात् नित्य भावना रूप दिव्य अवध में श्री सीताराम जो के मुख्य महल का गोपुर नाम खास ड्योढ़ी दरवाजा को वासी कैसे कै भयो कि श्रा गुरु संत अनुप्रह ते, सो यह रहस्य (गुप्त) महा माधुरी मय नित्य अवध भावना ध्यान रिस क जनन के भावना करन हित ताही गोपुर वासी ने प्रकासी नाम प्रगट वर्णन कियो है ॥७९॥

॥ मूल ॥

ध्यानमञ्जरी नाम सुनत मन मोद बढ़ावे। श्री रघुवर को दास मुदित मन अग्र सो गावै।।८०॥ इति श्रीस्वामीरामानन्दश्रीअनन्तानन्दपदाश्रित—

पयोहारी श्रीकृष्णदासचरणानुग

श्री अग्रदासविरचिता

श्री सीताराम ध्यानमंजरी संपूर्ण।। श्री सीतारामार्पणमंस्तु श्री: ।।

अर्थ - यह रहस्य को नाम श्री सीतारामध्यानमं जरी है। सुनत संते मन में मोद बढ़ावनेहारी है। तब ध्यान धरत संते क्या कहना है?

श्रा कहे श्री जानकी जी सहित जे रघुतर तिनको दास मुदित मन जो अग्र सो गावै। तात्पर्य्य यह कि जो श्री रघुतर को दास होयगो; ताको श्री रघुतर अवश्य मुदित करैंगे। यथा श्रो गोस्वामी जी—

पुनः तुलसी मुदित जाको राजाराम जई है ॥ ''माग तुलसी की भल्ने साहब को जन भो ।''—इत्यादि श्री गीतावली । अरु दास कहने का हेतु यह है कि जीवात्मा सब परमात्मा श्री रघुवर के नित्य दास हैं। यथा श्लोक :—

> "दासभूता सुतः सर्वे ह्यात्मानो परमात्मनः। नान्यथा लक्षणं येषां बंधे मुक्ति हि सर्वेदा॥"

अरु दासधर्म सेवा कैंकर्य है, सोई जोवन को जोवन आधार है, भावना प्रत्यक्ष दोनों दशा में।

॥ हरिः ॐ तत्सत्, श्रीमते राम बन्द्राय नमः ॥

टीकाकारकृत ।। दोहा ।। बन्दौं श्रो सरयू अवध, सिय रघुवर हनुमन्त । भरत रुषन रिपुदमनपद, श्री गुरु धनु शर सन्त ॥ कृत मकरन्द सुमाधुरी, टीका मणि रस राम । कहिं सुनिहं तिन हित करैं, जय श्री सीताराम ॥

छन्द वरवे (टोकाकारकृत)
शत उनीस पुनि पचपन संवत माहि।
माधव सित भृगु जानिक नवमी काहि॥१॥
सीताराम शरण जन मणि रस राम।
टीका रिच तट सरयू अवध सुधाम॥२॥
अग्रस्वामि पद बंदै माँगे येहु।
हिये ध्यान सिय रघुवर नाम सनेहु॥३॥:

कवित्त (टीकाकारकृत)

जुगल किशोर गीर श्यामल सनेह सने
लिल ते उछाह छिव छाके दो उदोहुँन के
लूटत अनन्द लीला लोभित लसे रहैं।।
फैरत विलोचन विलोल त्यों विनोद माते
राते रस रंग तन हेरत हैं से रहैं।
सिया रघुनन्दन अनन्दकन्द युगचन्द
ऐसेहि हमारे हिय वियत बसे रहें।
इति श्रीरामानन्दीयश्रीराघवेन्द्रसुहृत् श्रीकामदेन्द्रमणिशिष्येण
श्री सीतारामशरणरसराममणिनांकृता
श्री सीतारामध्यानमंजरो मकरन्दमाधुरो टोका संपूर्णा
।। श्रीसीतारामार्पणमस्तु ।। श्री गुरुभ्यो नमः।।

( <sup>१</sup>वियत-आकाश, हृदयाकाश में युगलचन्द )

# ।। परिशिष्ट भाग ।।

# श्री धनुर्वाणपरत्वपरिचायक

# ।। कवित्त।।

राजै रघुनाथ वामहाथ रसरंगमनी

दिव्य काम चाप ते सुचारु चित्रकारी को। सुने जासु रोंदा को कठोर घोर सोर कंपै,

अरि जैसे करि सुनि नाद कुंजरारी को।। संत सुरपाल वंक वालक मयंक गति,

लंकपति काल अभयदायक दुखारी को। धरनी धरम धेनु द्विज रखवार भारी,

बन्दौं आयुधाधिप धनुष धनुधारी को ॥ महावायु वसत हमेस जुग पंखन पै,

छूटत में छोभैं सातो सिन्धु त्यौं जहान हैं। फर पै विराज भानु पावक महान दोऊ,

गुरुता गजब मेरु मंदर समान है।। सुच्छम अकास ज्यौं प्रकासें रसरंग मणी,

एक ते अमोघ होत रूप वेप्रमान है। कुलिस ते कोटि गुने शूल ते सहस्र गुने,

चक्र ते चालीस गुने चौखे रामावन हैं।।

देखत अवध को आनन्द।
हरिष वरषत सुमन निसि दिन देवतिन को वृंद।।
नगर-रचना सिखन को विधि तकत बहु विधिवन्द।
निपट लागत अगम ज्यों जलचरिह गमन सुछंद।।
मुदित पुरलोगिन सराहत निरिख सुखमाकंद।
जिनके सुअलि-चल पियत राम-मुखारिबन्द मरंद।।
मध्य ब्योम विलंबि चलत दिनेश-उडुगन-चंद।
रामपुरी विलोकि 'तुलसी' मिटत सब दुख-दंद।।

प्क भरोसो एक बल एक आस विश्वास ।
एक राम घनश्याम हित, चातक तुलसीदास ॥
एक भरोसो रामबल रामनाम विश्वास ।
स्मिरि नाम मंगल कुसल, माँगत तुलसीदास ॥
तवलिंग कुसल न जीव कहाँ सपनेहूं मन विश्राम ।
जब लिंग भजत न रामपद सोकधाम तिज काम ॥
स्मिता सांपिनि वदल बिल, जो न जपिह हिरनाम ।
स्मिता सांपिनि वदल बिल, जो न जपिह हिरनाम ।
हिं तुलसी प्रेम न राम सो, ताहि बिधाता बाम ॥
हिं तुलसी प्रेम न राम सो, ताहि बिधाता बाम ॥
हिं तुलसी प्रेम न राम सो, ताहि बिधाता बाम ॥
हिं तुलसी प्रेम न राम सो, ताहि बिधाता बाम ॥
हिं तुलसी प्रेम न राम सो, ताहि बिधाता बाम ॥
हिं तुलसी प्रेम न राम सो, ताहि बिधाता बाम ॥
हिं तुलसी प्रेम न राम सो, ताहि बिधाता बाम ॥
हिं सुवहि सुवहि पुलकहि नहीं तुलसी सुमिरत राम ॥
हिं सुविध सुलकहि नहीं तुलसी सुमिरत राम ॥